

敬業堂詩集

冊三



敬業堂詩集卷十一目錄

竿木集

送趙秋谷宮坊罷官歸益都四首 初冬拜朱大司空墓感賦

竹垞招遊白雲觀同錢鷗舫王令貽魏水村嚴寶仍吳震一分韻二首

重宿傳經書屋與愷功舊話次唐實君留別四首韻

恆齋邀嘗桑落酒同竹垞賦二首 同竹垞水村步入一莖菴登妙光閣

善果寺

歸義寺

冬菊聯句二十韻

呂灌園屬題小影二首

冬夜朱介垣給諫宅觀倒刺和竹垞兄絕句四首

大司馬合肥李公見示遊盤山十律兼屬繼和敬題二章於後

陸端轂索贈

讀張趾肇徐安序冬日感懷唱和詩

次原韻二首

奉送玉峯尚書徐公南歸五十韻

送許朔方之雲中

題許霜岩畫扇

鳴鶴亭詩為關中張鳳舉賦四首 題沈客子寒郊調馬圖二首

西城別墅十三詠新城王清遠屬賦

將出都門感懷述事上澤州冢宰陳公一百韻

送徐道勇宰順德 酬別許暘谷

夜飲槐樹斜街花下酬別竹垞水村

酬別譚護城

題壁集

早出彰儀門魏馬平談震方沈客子追送於十里之外馬上留別二首

長新店重別孫愷似王令詒嚴寶仍劉大山家荊州兄三首

良鄉次西溟韻 琉璃河次湯西厓壁間韻

寒食過涿州和西溟 清明新城道中

辛白溝旅店見亡友鄭樊圃舊題愴然有感同西溟作

過趙北口晨餐得魚戲和西溟 任丘遇禹司賓尚基歸自閩南以蜜

漬荔枝分餉目錄

商家林早渡

冉家橋

景州次西溟韻

平原口占戲示西溟二首

夜雨

從十里望抵晏城

大清橋

崑山

上巳泰安道中和西溟

欲登岱不果戲柬周通守燕客

羊流店

新泰城南望蒙山

發蒙陰至青馳寺

渡沂水

三月初九日自郟城看桃李至紅花

埠二首

官柳

大雨早發宿遷

曉晴入桃源界和西溟

渡河

淮安上船

過喬石林侍讀縱棹圖

喬侍讀席上贈歌者六郎

高郵舟中

揚州遇杜蒼略

王羲文閣復申招同西溟泛舟紅橋二首

西溟談及竹西舊事戲調之

阻風瓜洲望金山

月下渡揚子江次西溟韻

虎丘後山人家

閩門卽事

吳江

禾中田家

過梅里訪朱西峻

題家保三兄小影

題西峻月波吹笛圖二首

柘湖感舊和徐淮江

齊門夜泊

吳門喜遇田間先生

崑山劉改之先生墓和顧伊人

題沈石田秋江待渡畫卷

題陸漢標墨菜圖

武林寓舍楊少司馬以鮮荔分餉賦謝

四殤詩

苦雨聯句

敬業堂詩集卷十一目錄

敬業堂詩集卷十一

海寧 查慎行 悔餘

竿木集

起己巳十月
盡庚午二月

飲酒得罪古亦有之好事生風旁加指斥其擊而去之者意雖不在蘇子
美而子美亦不免焉禪家有云竿木隨身逢場作戲聊用自解云爾非以
解客嘲也

送趙秋谷宮坊罷官歸益都四首

時秋谷與余
同被吏議

竿木逢場一咲成酒徒作計太憨生荆高市上重相見搖手休呼舊姓名

劉魯封章指摘生滄浪大可濯塵纓肯言預會皆名士誰似君家老叔平

君別蓬山作謫星我從霧谷擬潛形風波人海知多少聚散何關兩葉萍

南北分飛悵各天輪他先我著歸鞭欲逃世網無多語莫遣詩名萬口傳

秋谷
贈余

詩有與君南北馬牛風
一咲同逃世網中之句

初冬拜朱大司空墓感賦

城南舊是陪遊地一片蒼涼野哭中宿草墓門黃葉雨亂鴉祠宇白楊風餘生
削跡誰知己往事傷心我負公肯信九原還有路人間何處不途窮

竹垞招遊白雲觀同錢鷗舫王令貽魏水村巖寶仍吳震一分韻二首

沙晴冬候暖古觀晚蒼涼一徑踏殘葉半庭餘夕陽泥封丹竈合石護醮壇方

華表依稀似蓬萊是故鄉

得方字

燕丘吾舊到逐伴記新春羽帳千年蛻虛堂四壁塵名山遊已晚遺跡訪初真

欲補儒仙傳欣逢好事人

得春字

重宿傳經書屋與愷功話舊次唐實君留別四首韻

再來欣接席昨去惜分襟兩度平安字三年聚散心夢中追舊事愁裏廢孤吟

豈意麻茶眼重窺翰墨林

絕域身曾到名駒小最能膽教更事壯詩喜逐年增畏客門長閉看山閣偶登

故知關性分愛近讀書燈

款款留吾住依依見汝情硯水融墨淡爐火撥灰明淺夜談難足流年感易成

雞頭池上月白髮照初生

易作匆匆別華堂費夢思暗鐘隨杵斷殘燭得花遲
穎待囊錐脫斑從管豹窺
出藍真屬望慚媿我稱師

恆齋邀嘗桑落酒同竹垞賦二首

哆口長餅壓酒杯隔簾鏘器爲親開不愁更欠尋常債
每過朱家醉始回
石湖詩句也風流橘露松舫品最優五斗蒲桃真濁味
肯將石室換涼州

同竹垞水村步入一莖菴登妙光閣

偶然聯客袂隨意叩禪關門徑忽新改居僧出未還
一尖城上塔幾點樹頭山
此處宜看雪危梯約再攀

善果寺

高林鳴枯風院淨如潑水時有杖藜僧下塔拾槐子

歸義寺

中有遠初石幢

地作隣人業苔侵破廟塹兩三碑背字猶記會同年

冬菊聯句二十韻

猶剩籬邊朵幽香伴小齋魏坤祇緣開較晚真與俗難諧慎行憶植當松逕分苗傍

秋稽坤一行頭並摘幾稜手親排慎行未治鼃兼黽先防虎似豺坤栽培從老圃

束縛向斜街慎行擔喜連泥買僮嗔冒雨差坤素心邀我賞倦眼為君揩慎行白酒

重陽過清吟十月偕坤瘦窗圍竹几涼路別樓鞦慎行獵獵風捎幔紛紛月浸塔

坤稍應愁雪妬幸不被塵埋慎行采可籩新釀簪宜綴冷釵坤葉經霜後斂花比

節前佳慎行小塔燈雙影低屏水一涯坤落隨騷客賦淡入雅人懷慎行寒色方凝

榦新芽已發菱坤過時拋瓦缶留種記牙牌慎行按譜名空羨餐英願尚乖坤明

年須放早吾欲返荆柴慎行

呂灌園屬題小影二首

不知何處響淙淙峭削藤蘿側面峯喚起清風答清嘯濤聲飛上最高松

曾向山陰作寓公一筇歸借白頭翁跣趺消得幾多地何必千岩万壑中

冬夜朱介垣給諫宅觀倒刺和竹垞兄絕句四首

樺燭枝枝細吐煙曲屏影裏夜如年索郎美酒看婆舞醉倒蘇家藥玉船

時介垣新

得此杯

雙燕身輕拂地迴歌頭舞遍一回回問渠從小誰傳得似按西涼坐部來
鐵撥檀槽急作聲六么鞞上一牀箏忽驚雷雨簾前起殘雪開窗月正晴
薄薄粧梳楚楚伶酒邊孤客對飄零紅筵大有開元曲別樣傷心已怕聽

大司馬合肥李公見示遊盤山十律兼屬繼和敬題二章於後

泉石曾關十載心勝遊往往礙朝簷也知去郭無多遠所喜探幽不在深紫蓋
自開蒼蘚路紅紗長護碧山吟滿空何限松篁韻盡入鸞歌鳳舞音

不教騶唱駭山僧竹杖籃輿取次登老樹傲霜還帶葉細泉迎暖未成冰盤來
磴道雲千疊遠處峯巒雪幾層已失從遊吾自悔得披高咏興偏增

陸端轅索贈

五色邵平瓜一口韓康價古來高世士亦在長安下軟塵堆裏記相逢歸夢時
時寄短篷筆床茶竈何年具準擬尋君笠澤東

讀張趾肇徐安序冬日感懷唱和詩次原韻二首

窗隙飛塵日易斜，忽披新句感尤加。
路難不爲登樓賦，才盡非關入夢花。
倚竹何心矜翠袖，聽歌有泪滴紅牙。
斷蓬生事無聊極，不獨君悲我亦嗟。
小榻吟成膝自搖，一燈照影共淪飄。
雪侵短鬢雙雙換，寒入深杯九九消。
得氣盆梅偏早綻，向陽籬菊未全凋。
相期並了殘年課，添箇詩筒遣寂寥。

奉送玉峯尚書徐公南歸五十韻

大儒出處途秉道，貴得正行藏。既自斷進退，詎關命我公。
如星雲一出，朝野慶皋夔。奮事功，燕許爛詔令，放之彌六合。
鴻業豈易竟，立朝二十年。風節嚴且勁，高文藉討論。
大禮資援証，以茲契聖情。題扁字輝映，交孚由一德。
心愛非貌敬，國家有元氣。培養在交儆，儲材本報國。
夾袋記名姓，必若入收羅。先須覈言行，春秋兩校士。
冰鑒中外瑩，大匠洪陶鈞。劍光出磨鋸，別裁務去僞。
崇雅自刪鄭，豈不數才難。得人際斯盛，煌煌起衰手。
草野議敢橫，中流砥狂瀾。公論翕然定，官雖謝執法。
講每直崇政，休沐有常期。歲時奉朝請，從容大臣體。
恬退君子

性朝來忽拜疏辭切回天聽 帝曰卿往哉疇爲執文柄答云臣力憊感激泪
交迸告歸端傲裝首路春維孟 詔以書局隨還家就參訂牛腰一百車多與

二酉競方輿廣樂史續鑑改陳桎高館闢翹材名流撤徵聘 謂姜西溟黃俞邵諸君 遇榮

一時絕典曠千古夙樂天名位似司馬聲華位鄴侯未足論矧可擬張邴平生

釣游處父老喜相迎太湖洵幽絕天水俱綠淨七十二煙鬟一一落明鏡 公將開書

局於洞庭山 八窗陳鼎彝四壁開書燈清音絲間竹逸響鐘答磬鶯花晨赴社魚稻

晚報榮暑衫便苧葛臘釀雜賢聖著書閒有餘卽事樂難罄小子學無成風塵

困趨趙影慚舞袖短顏讓時粧靚饑朔行自嘲寒郊語尤硬迂疎頗知量鬪捷

肯爭徑振翅無雲霄觸藩有機穽蹉跎曩悔失鹵莽行恐更世自傾波濤吾方

溷泥濘重來仰翦拂鬱抱實怏怏公在士氣伸公歸士氣病從公願于邁百感

發孤咏 時相約同出都

送許朔方之雲中

昔我未識子先與錢生 木菴 友亟言平生驩三許不去口嗚谷詩絕倫南交畫無

偶朔方年最少蘊蓄靡不有次第獲論交前言果匪苟燕臺昨于役小許實先

後甲子夏與玉友
朔方同入都

茫茫人海中相左十八九移時一把臂款曲心互剖吁嗟輕

薄兒覆雨數某某勤拳托末契所得良已厚方知情親疎不係交暫久風塵有
岐路南北莽分手錢生走從軍余去扶病叟重來會合地驚顧各衰醜慷慨倚
和歌淋漓藉杯酒子仍青兩鬢末座獨昂首也復可憐生雙顴削而黝須臾雙
耳熱擊筑間鼓缶疾風掃河梁挽斷塞門柳前歡今偶續知有後期否故人諸
曹郎出作雲中守子行赴贊畫側翅義奚取行踪等飛蓬離緒如剪韭長亭七
十五山勢西北走并州非故鄉却立望南斗

題許霜岩畫扇

風前撩亂萬梢柳柳外天斜一扇篷箇是儂家舊詩景江湖回首畫圖中

鳴鶴亭詩爲關中張鳳舉賦四首

不織筠籠但築亭紅欄日日看梳翎人間只有張公子合向天河伴翼星

隔窗長聽讀書聲識字多來品倍清

金城衛氏鶴日飼以粥教之三年能識字

應咲六郎才思劣羽

衣刻木坐吹笙

飲啄依人不自持都緣骨瘦便稱奇雲霄儘有孤飛處偏愛亭亭獨立時

丈八坡陀尺五天侯門如故客如仙憐他一片氈氈影曾上羊公舊舞筵

鳳舉為靖

逆侯少子

題沈客子寒郊調馬圖二首

以下庚午春初作

潑墨揮毫事能帶腰吟瘦沈吳興如何却向漁陽道毡帽茸裘學按鷹

小益戎裝悔浪遊不成投筆取封侯殘年射虎非吾分白石山南去飯牛

西城別墅十三詠新城王清遠屬賦

雲氣朝出岩亭陰滄然接劃分一片影側展屏風疊浦口有漁榔落帆如斷葉

石帆亭

戢戢犀角雛斑斑鹿皮籜春來頻改路客過行長錯欲斬又躊躕萬竿殊不惡

竹徑

秦封五大夫兩生獨不肯托根此得地雙榦鬪清迥老鸚暮歸巢殘陽在高原

雙松
書塢

虎目逃斧斤輪困誰惜汝薰蕕自然別靈蠢性所予材與不材間楠兮知自處

大椿
軒

九子得其三五老失其二一峯復一峯峯峯不相似雖非木假山可少老蘇記

三峯

蝴蝶滿南園風輕草初剪林霏入煙霧古洞春猶淺好去向龍岩築菴名碧蘚

小簪
卷洞

迴溪轉灣澗滴翠如滴乳岸容兼水色遮斷橋西浦一卷落床頭春深夜來雨

綠蘿
書屋

不離文字禪半偈亦已多何異百十萬烝沙散恆河蓮華清漏底晏坐夫云何

半偈
閣

蒼濤翻半空清響一聲作頑仙不耐聽下有側頂鶴夜深忽飛去欻欻衆星落

嘯
臺

鵲山出林郭高處割一拳坐令諸兒孫羅列丈人前對之能下拜米顛豈非仙
丈石

草外瑟瑟波波平兩三頃紅鱗尺半魚倒嚼桃花影西堂夢初覺佳句時一警

春草池

仙犬吠靈根鴉勑往堪鬪曾隨康樂屐竟入麻源谷一咲却歸來披圖作橫幅

小華子岡

耕犁起同晨牧笛行向晚小庭閒倚杖正值唱歌返杳杳漸無聲去村知近遠

樵唱軒

將出都門感懷述事上澤州家宰陳公一百韻

當代中天治千秋一德期大賢多間出鴻業並昭垂夫子金闈彥名家玉樹枝
傳天飛鸞驚拔水出蛟螭理學源流泝文章談咲麾巍科仍早掇雅望迴標持
館閣迴翔地風雲獻納資居高懸藻鑑集益藉論思博物時無亞多聞議必諮
六曹兼掌故九列讓委蛇共指文星煥寧關好爵縻綱維張有自津浹挹無涯

溯厥流風遠恭惟樹德滋晉陽丁末季瀆澤徧瘡痍團結因鄉社招搖視義旗
千村同保障一姓獨登陴布置隨方略分明受撫綏險憑雙堠設煙合万家炊
寇至呼咸集歸窮戒勿追宗人全鐵軸隣叟穩耕犁歲事重憂旱并民又阻飢
九重加軫念百族尙厓羸焚券情相卹嗟來事可嗤甫田憐士女世祿散京坻
積貯崇朝盡陰功里老知當官嗟覆餗扣戶仰由頤及見家餘慶方知善可爲
潤沾千里遠力賑一方疲地近瞻恆嶽川長入晉祠午園留獨樂甲第拓前規
好古兼金石搜奇及鼎彝異香黎峒結祕色汝州磁畫幀多裝軸書囊或借瓶
筆馳中壘陣墨洗右軍池弟子河汾感宮牆魯國推名爭歸夾袋坐愛傍紗帷
手引煙霞上情均雨露施賢良承漢策雅頌叶周詩至化行如此斯文儼在茲
升庸 朝有道羅致野靡遺竊喜逢時泰翻成數數奇異材胥奮發蹇足獨顛
危詎敢誇華胄聊因述鄙私婺源分末派海表發南支大理馳封啓中丞畫戟
移澤流京兆厚禍發黨人奇世廟當中葉分宜位鼎司彈章辭激烈伏闕涕漣
漉嚴譴孤蹤逮流官絕域羈左垣言幸中東市魄終褫門子承堂構文孫接履

慕謝宗經鼎盛裴眷有中衰五葉傳清白全家際亂離兵戈屯井閤榛棘變堂
基春誤尋巢燕秋荒插菊籬先人旋遯跡壯志局茅茨比杜經天寶如陶閱義
熙流光傷易邁風木感先萎小子真無似孤懷忝自惟墳簞偕伯仲弓冶學裘
箕蚤被儒冠誤長遭俗目欺升沈渾莫定矩矱恐長隳蕭瑟囚山計荒唐捷戶
賞不成終泯沒那得避欽崎會有從軍役寧甘伏櫪悲黔山峯轟轟楚水浪差
差鉦鼓淵闐發蕭笳斷續吹征夫攀塞柳野客詠江籬戎事從人問行間借馬
騎瘴林棲狒鷲菁谷竄狐狸耳聽鶉啼血心驚觀築屍晝紅烽乍舉月黑路偏
欹短褐星埃入遐陬露布馳圖披新聚米局按着殘棋橫草名空挂封侯望本
癡飄然辭幕府逖矣走京師古有矜懷刺時方薄處雖姓名埋失路出處謝端
著徒步親頑僕低顏向細兒幾逢收駿骨深畏妬蛾眉久抱違時性兼無媚俗
姿泥深蹄蹙躃風逆羽襜縱逐伴聽歌曲無聊托酒卮波瀾人海闊竿木戲場
隨照壁寧防蠍吹毛竟得疵任安書未答朱穆論何疑夢或驚沙蜮歸將友澤
麋棄繻知昨失鑄鐵悔今遲不謂逢韓愈猶煩說項斯感公寬禮數容我揖堦

墀未有阿房賦徒懷北郭絲迂疎疑寸管許與到單詞峭置千尋壁弘開入達
遠春陽蒙煦暝霽月睹光儀款款憐才意依依戀別時爨薪餘樸楸鍛竈仗鑪
錘鬢黷雲敷土微茫海測蠡義高攀莫及身賤語終卑此去鞭重把何年閣再
窺鷗波殊浩蕩泛泛問何之

送徐道勇宰順德

萬里驅車路韓蘇蹟尙留往時愁謫宦今日羨吟游邊海夏無瘴看山朝有樓

感君懸榻意謂我是詩流

時相約同行余迫歸計不及赴

酬別許暘谷

男兒有才人見之如眉在額指在掌蘭苕翡翠大海鯨相去中間幾霄壤天資
必從學力到拱把桐梓視培養方今儕輩盛稱詩萬口雷同和浮響或模漢魏
或唐宋分道揚鑣胡不廣何曾入室溯流源未免窺樊借依傍我持此論嗤者
衆同志吳中乃得兩惠生元龍格律最謹嚴錢子玉友才情殊侷儻不知此外復誰
敵晉楚居然互雄長得君忽訝鼎足成一戰三分定擾攘君才自是詩中虎盡

遣風雲歸俛仰蜀江到海一萬里岱岳登峯八千丈有時分派蓄烟波間亦浮
嵐滄林莽初看澹沲與神會倏轉玲瓏非意想書評取瘦嘲杜陵畫品近肥关
周昉穠纖斟酌雅粧宜骨月停勻神駿賞愛君此境口莫喻俗手安能事撫仿
彼非識者勿浪傳若有知音必弘獎余雖好吟久成癖所業未充終怊恍邇來
屬藁輒欲焚傷仄無端櫻世網徒將字句供指摘豈有聲華出標榜此時披豁
喜相從乍挹西山朝氣爽論卑引我爲同調烏爪時時發背癢君辭愈降我愈
慚文繡飾犧毋乃枉皇天老眼不到地半世駢馳絆塵鞅三間草屋百索田願
本非奢力難強我今忍飢亦決去麋鹿山林合長往閉門更讀書十年尙冀成
章附吾黨故人倘記臨別約鬪鴨欄邊好相訪數折溪橋蕩槳迎歌聲正出蘋
花港

夜飲槐樹斜街花下酬別竹垞水村

丁子香邊欄檻小桃花底杯槃廚燈隔院人靜社雨添衣夜寒殊方賦別最苦
失路還家又難懊惱鶯啼時節相思多在春殘

時余將南歸

酬別譚護城都諫

知己無如我少交情得似君難獨留一榻相待長把深杯對乾宣武門南舊宅

虎坊橋畔扶欄可惜手栽紅藥花開又讓人看虎坊橋東舊寓去秋曾種芍藥八本余將歸君又遷居故末云

然

題壁集起庚午二月終六月

玉峯大司寇徐公 予告南歸奉 旨仍領書局出都時邀姜西溟及余

偕行兩人日有唱和旗亭埃館汗壁書牆率多口占之作本不足存存之

所以記行跡也

早出彰儀門魏禹平談震方沈客子追送於十里之外馬上留別二首

已着征衫上別鞦韆道傍何意復停鞭人生聚散原難定又算班荆一度緣

杏蕊開時柳葉新眼明差喜出紅塵京華回首無多戀萬疊西山幾故人

長新店重別孫愷似王令詒嚴寶仍劉大山家荊州兄三首

尚書書局出隨身供帳爭看祖道新轂鯨車輕御尾去可憐我亦一歸人

壞壁尋詩又一回，殘尊重洗別時杯。不因此去添招悵，輕跨征鞍自悔來。

別期長，短路連綿春淺。漁陽二月天，却檢曆頭同此日。驚心南北忽三年。

前年南還

去年北發今東裝出都俱二月二十一日亦一奇也

良鄉次西溟韻

乍來灰洞喜無風，馬足殘泥曉漸融。料石岡邊春雨晚，廢田無麥草葱蔥。

琉璃河次湯西厓壁間韻

日痕紅曙露初晞，草色迎人欲上衣。頓覺水鄉風景好，一羣野鴨踏波飛。

寒食過涿州和西溟

柳色初濃凹字城，胡良河上偈清明。故園三百長亭外，貪得花時一月晴。

清明新城道中

縣南風颭酒帘多，澹澹新煙瑟瑟波。一路人家齊上塚，紙錢飛過白溝河。

白溝旅店見亡友鄭樊圃舊題愴然有感同西溟作

一鞭重度瓦橋關，落魄星埃髮各斑。忽見故人題壁在，轉憐爾我是生還。

過趙北口晨餐得魚戲和西溟

淼淼波光漾碧虛中央一帶是民居綠楊影裏留竿起彈鋏人歸食有魚
任丘遇禹司賓尙基歸自閩南以蜜漬荔枝分餉

易栗寧桃已厭嘗愛聽風味說南方費他陸賈千金橐與致紅綃十八娘

商家林早發

村店荒荒殺漏遲喚回殘夢眼迷離曉星一箇明如月及取朝陽未吐時

冉家橋

楊椿夾岸草抽芽一綫枯河萬斛沙記得去年鞭馬渡滿渠春漲拍桃花

景州次西溟韻

時畿輔苦旱

自從騎馬出春明滿眼流移愴客情此日畿南行向盡喜逢田婦餉春耕

平原口占戲示西溟二首

碌碌因人事竟成當初原未識先生處囊脫穎渾閒事何苦區區自請行
若將毛遂比夸門知己何人合感恩却咲能詩李長吉信陵不繡繡平原

夜雨

倦枕更闌睡不成
白楊葉戰雨來聲
油燈欲滅尙未滅
駁電隔窗時一明
從十里望抵晏城

春塍雨潤少飛沙
別取林坳一道斜
紅袖倚門桃傍井
又緣迷路得看花

大清橋

風柔自覺輕衫便
山近微嫌濕翠多
日暮大清橋畔望
一叢春樹擁齊河

崗山

古驛東來路一灣
萬枝翠柏護蒼顏
不知斤斧逃何幸
大似吾鄉近海山

上巳泰安道中和西溟

平山堂畔忽經年
又是荒程上巳天
慚愧粳家供野味
樹頭小串摘榆錢

欲登岱不果戲柬周通守燕客

潮白三更開島嶼
烟青九點散齊州
輸他監稅周簽判
日日肩輿到上頭

羊流店

峴首沉碑事渺茫空傳有淚墮襄陽居人自重羊公里未必英雄戀故鄉

新泰城南望蒙山

翠岱孤抽碧玉簪羣山餘勢失嶄嶄晴雲忽斷東南角又露東蒙一兩尖

發蒙陰至青駝寺

桑邊棗下嶽崎路亂石堆堆數驛亭野草不知春意好燒痕三月未全青

渡沂水

白沙沒騾水平腰舟子招人上小船指似翠華南頓路舊年此處有浮橋

三月初九日自郟城看桃李至紅花埠二首

枝枝能白復能紅光景年時約略同行過曹村貪小住雙禽對語百花中

油菜花開十里黃一村蜂蝶鬧斜陽明知尙隔江淮岸風物看看近故鄉

官柳

種柳河干比伐檀黃流今已報安瀾可憐一路青青色直到淮南總屬官

大雨早發宿遷

洶洶波聲響濁流疾風吹雨渡潮溝眼前一事差強意河北人家麥有秋

晚晴入桃源界和西溟

鳴鳩聲裏發孤城行到桃源落照明一色東風占兩候曉程催雨暮催晴

渡河

沙雨晴來日氣和漲痕連岸落帆多春風吹過桃花信啼鳩一聲人渡河

淮安上船

厭聽鈴聲愛入舟只應洗耳向清流瓣香夜謁淮神廟夢穩江南第一州

過喬石林侍讀縱棹園

一天風雨禁荼蘼紅藥空欄信尚遲只道淮東春已盡鴨桃猶剩兩三枝

喬侍讀席上贈歌者六郎

欲顧曾無一字訛子絃徐引曼聲歌青衫憔悴無如我酒綠燈紅奈爾何

高郵舟中

蔣牙荻笋碧於天涸水瀕湖出葑田鷗鷺較多人較少斷橋邊有賣魚船

揚州遇杜蒼略

龍眠方邵村侍御

又繼黃岡歿

謂令兄饑鳳先生

江左風流跡已陳今日聽君談往事如逢

天寶舊宮人

王羲文閣復申招同西溟泛舟紅橋二首

誰家園子得春多
繭栗梢頭花信過
一曲紅欄隨棹轉
綠陰濃處忽笙歌
十里珠簾廿四橋
百年花月履綦銷
多情愛拂遊人面
尙有垂楊萬萬條

西溟談及竹西舊事戲調之

綠楊書畫記停船
一夢揚州又十年
見說伎樓渾冷落
鬢絲誰惜杜樊川

阻風瓜洲望金山

狂飈高駕海豐開
雪浪千堆倒捲迴
霧氣欲吞吞不得
紺宮浮出小蓬萊

月下渡揚子江次西溟韻

妙高峯下曉鐘撞
隔岸吳船正發幫
風露一天人擁被
櫓枝搖夢過春江

虎丘後山人家

築岸開池別有津
小橋低映碧鱗鱗
河豚上後魚花賤
多少山根種水人
閩門卽事

穠花剛被樓遮却
又見隣牆出好枝
一種風光誰管領
金閩門外暮春時

吳江

鱸鄉亭畔麥垂芒
水落潮田已半黃
曲折支流通小港
家家門外有船坊

禾中田家

到耳初聞鶉啼平
疇小稜趁高低
茅針已老桑芽嫩
時節人家正簞泥

過梅里訪朱西峻

也知陟岵意仍違
纔得還家換袂衣
爲報而翁吟望久
白頭京國苦思歸
竹垞先生

尚留燕

題家保三兄小影

分無擁髻對伶玄
赤脚歸仍侍玉川
怪得披圖還一咲
破窗難燭看神仙

題西峻月波吹笛圖二首

苔樣蓑衣綠蓋篷輕篙閒插月明中水禽兩兩背船去獨倚贛洲一笛風
一天雲細作魚鱗千頃頗黎瀉濕銀解聽鶴南飛曲好不知誰是倚樓人

柘湖感舊和徐淮江

滿湖輕浪綠差差別樣風光兩度期楊柳半帆春載酒薔薇一硯雨催詩未知
此後花誰主可惜重來鬢已絲早是驚心八年事夢闌燈炧不多時

齊門夜泊

扁舟蕩漾具區東使盡西南一日風到岸帆檣煙霧隔河簾閣雨濛濛忽來
人語蛙聲外亂颭燈光水氣中也識去家今較近酒闌依舊感飄蓬

吳門喜遇田間先生

髮光如葆氣如虹崛強人間八十翁最喜塵埃經歲別還看筋力舊時同文章
有品傳方遠風雨藏山業未終藏山集先生未刻詩文也指與一星人盡識少微今日客吳

中

崑山劉改之先生墓和顧伊人

哀壑無人叫杜鵑馬鞍山麓古墳邊東齋路沒荒榛雨

東齋先生祠也今廢

北郭人犁

斷碣煙湖海尚疑豪氣在姓名翻藉布衣傳冬青種後諸陵廢南渡君臣更可

憐

題沈石田秋江待渡畫卷

晶晶波明蟹舍蒼蒼路轉漁灣落葉聲中間渡浮萍影裏看山

題陸漢標墨菜圖

小圃朝來露未晞早菘青脆晚菘肥老饕不要園官送直擬從君攫畫歸

武林寓舍少司馬楊公以鮮荔分餉賦謝

絳囊移得洵仙才珍重瓊漿贈十枚不向紅塵馳驛到却從碧海販鮮來色香

尚覺熏肌好冰雪真隨咲口開只是野人慚過分恍疑身自雪峯回

范石湖集四明海州

自福唐來順風三數日至得荔子色香都未減大勝戎括間所產曾有詩云郵船荔子如新摘行脚何須更雪峯

四殤詩

家貧望多男如農力菑畬將期秀而實焉得辭勤劬吾家兄弟間盛事傳鄉閭

仲氏艱舉子前年獲騶虞季子善生兒爛熳引衆雛我兒稍長成次亦舞勺踰
豈不顧恩誼未免督責俱嬌穉尙無知愛憐併屬渠阿巢甫七齡性慧早讀書
近尤喜作字狼籍塗墨豬騶虞頭角好秀眉清兩矐學語不能舌本驚老儒
阿載方斷乳氣壓群兒愚家僮聽指麾步步趨亦趨最小名阿午哇哇聲已殊
今年暮春杪我歸自燕都次第使來前琳琅玉璫璵排成一行雁聚若同隊魚
公然嫌姆抱見伯同爺呼漸熟意轉親競前爭挽鬚無何捨之出我又東遊吳
五月到崑山梅雨蒸肌膚去家五十日頗怪一信無濕螢照昏花雙眼交模糊
羣來入我夢繞膝形遽遽明朝急買舟冒暍返敝廬到門天已黑哭聲滿庭除
驚問哭何爲痘殤瘞泉壚一哀吾欲絕老泪沾襟裾自惟世業荒寶此七丈夫
半月奪其四嗚呼彼奚辜季子僅留一芝焚蘭未枯仲氏一併亡竟失掌上珠
矧乃客未返時德尹尙在都下遠隔天北隅便擬報杏殤作書寄江湖又恐傷汝父臨
緘復躊躇中腸集百念沈痛肯暫攄家門百年來天闕代有諸曾王父早世我
祖實少孤兩叔及先君長短歲月徂短者纔十九長者五十餘同祖凡八人其

三已丘墟早衰我更甚所歷多崎嶇浮生知幾年煎迫非一途傷哉感存歿天
意終何如

苦雨聯句

風噫作欠伸

顧圖河

天愁散咳唾纂纂繭絲微

慎行

捎捎箭鏃大排欄挂水簾

圖河震

瓦响雲磨隙景列缺馳

慎行

潛蹤鬱儀過衣纓黝黝醜

圖河

扉履濺泥污蝸蟻引長

涎

慎行

鼯怒鼓羣和嘒按聚蠅蠶

圖河

瘁肌飽蚊蛾嘔噦減食單

慎行

撲緣廢書課帖

席惡膠粘

圖河

歷階防跌蹉遙岑罨如遁

慎行

高浪騰誰簸方當戒舟杭

圖河

矧迺疲

鞍馱溝眵濘齊腰

慎行

田塍淖沒髀落衣妥兩肩

圖河

煙殼背一箇栖畝占來牟

慎行

分秧滯杭稔青葱卓針立

圖河

黃萎垂芒臥造物有暴殄

慎行

農功豈媮媮乾土盡

翻沈

圖河

漏天難補破餘飛遠乍散

慎行

晚色晴微作暑濕旋復蒸

圖河

壯陰那肯挫

走章牋碧翁

慎行

苦雨毋受賀

圖河

敬業堂詩集卷十一

珍做宋版印

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

敬業堂詩集卷十二目錄

橘社集

將赴洞庭書局雨中與徐淮江別二首

曉發胥口

渡太湖晚至東山

山居詩次大司寇徐公原韻三首

張漢瞻有喜余至山中之什次原韻

奉荅

同徐敬可吳西齋張漢瞻遊翠峯寺

和漢瞻韻

遠翠閣和漢瞻韻

微香閣次敬可韻

二峯和漢瞻韻

登莫釐峯二首和漢瞻

敞雲樓次顧文景范韻

姜西溟繼赴北闈今仍下第作詩招之

題劉氏東樓

出雲篇和西齋

送田間先生歸桐城兼寄高丹植明府

菊

山樓曉起

晚窗卽目

木芙蓉索漢瞻和

自題放鴨圖小影後四首

食橘二首

漢瞻自洞庭先歸詩以志別卽次見贈舊韻

夜坐有懷張漢瞻吳西齋

重登莫釐峯望吳興諸山

從渡水橋步行至武山小憩吳氏園亭十四韻

欲往豐圻看楓葉爲雨阻

大雨同胡拙明閣百詩登湖樓

順風渡湖瞬息抵胥口

虎丘晚泊

拔白詩

并序

朱雪鴻移居詩和梨洲先生

雪夜發玉峯數日前沈昭嗣呂山瀏顧書宣先往洞庭作詩寄之

從橫塘晚至木瀆舟中寒甚

雪後曉渡太湖山

次韻荅趙蒙泉閩中見懷之作

王令詒自閩歸出示途中見寄二章

次韻奉荅

送山瀏自洞庭歸塘西兼寄張介山

陸厚容金子由諸子

雲石菴和書宣韻

白龍泉和沈昭嗣韻

來鶴樓和韻

題書宣小影

書宣以藥酒一罍見餉賦謝

書宣次韻見答復倒用前韻作一章邀余繼和時書宣將歸揚州兼以贈

別

以藥酒分餉唐實君吳西齋再疊倒

韻索和

題鄒毅仁書劍圖

梁溪馬碧滄索題桐山草堂

題鄒舜五采蓴圖卷子次陳眉公舊

韻

發東山至石湖舟中大雪與蒙泉雪

園分韻

雪夜泊胥門與蒙泉抵足臥

雪後至閶門換船

吳門橋阻凍

入胥門訪薛孝穆不值留詩示之兼簡許暘谷錢玉友

打冰詞

阻冰七日始得發舟

夜泊平望驛橋下

敬業堂詩集卷十二目錄

...

...

...

...

...

...

...

...

...

...

...

敬業堂詩集卷十二

海寧 查慎行 悔餘

橘社集 起庚午秋 終十二月

橘社在洞庭東山之麓劉氏取以名園秋冬間假館於此與書局諸同人唱酬不少嚳城張漢瞻為鏤刻于吳中者非足本也

將赴洞庭書局雨中與徐淮江別二首

一領西風季子裘亂砧聲裏又殘秋人間尚有君憐我每過南湖作少留

小港平橋宛轉通船頭一片採菱風孤燈十載江湖雨腸斷瀟瀟此夜中

曉發胥口

半浮半沒樹頭樹乍合乍離山外山借取日光磨一鏡吳孃船上看煙鬟

渡太湖晚至東山

秋水如膏滑上船峭帆衝破五湖煙豈知地少雲多處別有橙黃橘綠天枕簟

欲清他夜夢杖藜行結好山緣詩人愛入雞豚社 橫煙鼻處雞豚社范只欠躬

敬業堂詩集 卷十一 中華書局聚

耕十畝田

山居詩次大司寇徐公原韻三首

得從林屋賦閒居勝駕還朝四望車萬頃波濤憑檻外一天風雨落帆初龍威寂寞重搜字笠澤叢殘舊著書便與伊川同擊壤何妨問答到樵漁

公歸海內重儒宗不數瑯琊那曼容霜晚黃分湖岸稻烟朝翠掃寺門松晴來片片雲盤鶴雨過條條澗飲龍見說莫釐峯絕頂時陪五老握青筇落托生涯最善愁慙來我亦欲忘憂淋漓命酒長連夕次第看花已過秋四壁書多仍萬卷五湖人少但扁舟西山勝概差能說與到還期爛熳遊

張漢瞻有喜余至山中之什次原韻奉荅

啣尾船開古渡頭櫓聲導我向中流似曾有約來同日不比無聊賦獨遊坐擁畫屏長對榻時同寓敝雲樓行逢精舍必登樓因君撥觸聯吟興豈可湖山少唱酬

同徐敬可吳西齋張漢瞻遊翠峯寺和漢瞻韻

陰雲解駁日光穿行盡松門始見天旛影自飄空翠外樵歌時出斷碑前經樓

晝靜孤鐘發井石痕深萬縷牽我欲問龍還乞水與君洗眼對殘編寺後有龍井為雪竇

禪師故蹟

遠翠閣和漢瞻韻

處士留陳迹閣為陳眉公所建軒窗背嶺開練光鋪几席烟氣濕亭臺林僻僧宜少天

晴鶴未迴共拚吟遣日無事定重來

微香閣次敬可韻

蘚徑碧侵遊子屐楓林紅上羽人衣一聲清磬落何處坐看香烟成翠微

二峯和漢瞻韻

儼與莫釐並所爭惟一拳未應甘出袴且喜得隨肩潮湧東隅日雲垂北面天

短筇如健僕扶上最高巔

登莫釐峯二首和漢瞻

青天七十二芙蓉個是芙蓉第一峯吳越有山多作案東南無水不朝宗盪空

日氣消飛蜃拔地風聲穩臥龍曾記岳陽樓畔望肯教雲夢芥吾胸

百層風磴盤旋上大似鞴鷹乍解條放眼不知何處盡置身直覺此峯高沈沈
海浦黃雲岸點點吳帆白鷺濤未免傍人嗤好事重陽已過興仍豪
時重九後四日

做雲樓次顧丈景范韵

堵墻高下列丹楓平視茫茫但碧空地迥最宜千尺上景奇獨占一山東湖光
夜閃疑飛電磴道秋垂似偃虹多媿元龍豪氣在每聞清嘯發樓中

姜西溟繼赴北闈今仍下第作詩招之

散是飛蓬聚是萍可憐南北總飄零一名於爾何輕重雙眼從人自醉醒沙路
離離鴉接翮霜天矯矯雁開翎此愁除有詩能豁亟買歸舸下洞庭

題劉氏東樓

連山正缺西南角合有高樓面太湖不許遊人誇目力淡雲濃日兩模糊

出雲篇和西齋

山以東得名羅列非一嶺兒孫丈人行屈首殊未肯今晨天忽雲晴色變滄洞
蒸蒸氣浮盜冒烟上井衆峯處囊中刻露雖出穎一峯獨埋沒有物踞其頂

陽鳥從東升對射却無影林寒不受照萬象淒以冷大風西北來作力一向猛
奔逃脫鱗甲破碎寧復整正賴湖腹寬吐吞在俄頃山人耳目炫夢嚙喚初醒
重看莫釐高乃若裘挈領

送田間先生歸桐城兼寄高丹植明府

滿篋詩文手自編秋風攜上皖江船氣吞湖海豪猶昔老閱滄桑骨已仙愁裏

豈堪論往事

先生詩集中有與先
君子長干酬答詩

部中容易著高賢馳書早報樅陽令薄少時

應致俸錢

菊

隨分沿溪細作行開時何必定重陽畦丁自愛無他種橘柚連山一例黃

山樓曉起

枕上秋風疑有雨覺來已是日高時拓窗簌簌墮黃葉蒼鼠驚人竄別枝

晚窗卽目

變態多從咫尺看只爭濃淡淺深間斜陽已落月未上煙外數峯如遠山

木芙蓉索漢瞻和

烏柏微丹鴨脚黃爭將病葉領秋光後時猶作好顏色
咲爾一枝紅拒霜

自題放鴨圖小影後四首

偶煩妙手寫吳綾未必扁舟與便乘一咲披圖還作識
此來真箇住松陵

淺水蘆根啞唳聞背蓬沿尾雪紛紛湖中別有東西鴨
飛向遙天莫亂羣

東鴨西鴨

太湖中二山名

奇絕佳名屬兩山新詩多著畫圖間放船不怕人爭路
自占儂家第一灣

東洞庭有

查灣西洞庭有查山見震澤編

不用低欄照水紅一竿活計趁樵風江湖老伴憐渠在
踏浪長隨卍角翁

東坡詩我

衰寄江湖老伴雜鵝鴨孟郊詩何如卍角翁至死不裹頭

食橘二首

樹樹垂垂顆顆勻山家生計不愁貧若教朱實仍包貢
那得分甘到野人

洞庭橘貢

唐宋時有之至明始罷瞿佑宗吉詩有玉食無緣進上方之句

小園一百二十樹摧壞年來成橘薪每到霜前悲手澤可堪客裏又嘗新

西園橘栽

先人手植也己巳冬寒悉皆凍斃故及之

漢瞻自洞庭先歸詩以志別卽次見贈舊韻

兼旬索句添窮忙草根唧唧蟲鳴霜尙慙皮陸作唱和敢與李杜爭光芒君詩
盡納三萬派山骨巉巖波洋洋登壇欲來執牛耳取徑故險迴羊腸林深霧黯
蓄幽氣虹見雨霽開晴光吟從舌端作倔強寫向紙面生低昂稍嫌工遲似司
馬容我咲傲林泉旁憶初弭棹同臥起明朝聯臂登高岡穿松踏石困俛仰攀
躋中道多徊徨奇峯忽拔二千尺快劍磨出蓮花鏗聳身側足狂叫絕生平奇
境得未嘗三湘七澤舊雖到却溯洲渚攀孤芳黃金荒臺感燕士畫棟高閣悲
滕王十年浪走癡已極游蹤脫略失故鄉星埃大咲一回首攝衣纔謁三高堂
所嗟筋力就疲憊漸遣興趣成頽唐眼前又當搖落候蒹葭露白秋蒼蒼不知
此中有何樂對爾意氣還飛揚男兒生涯志未豁善刀合學庖丁藏百觚醉汲
隣叟甕一枕倦寄高僧房得道在先成佛後茲理反覆天應償逢人但拜孟東

野去我獨惜張文昌扶筇縹緲有夙約

與漢瞻約游西山未果

肯計盜底無餘糧風波衝

冒總爲此子今束書我亦將行當長謠蒼黃竹不爾妙曲賡紅桑鬱鬱誰能耐

離索空樓夜雨思連床年來万事經眼見窮達竟分姜與湯

不分窮約姜與湯漢瞻舊句也謂西

溟西

舊遊如夢那可說祇有末路堪評量名山業豈異人事慎勿屑屑耽詞章

夜坐有懷張漢瞻吳西齋

二子相繼別去

山谷天早寒經檐白日速夜長耿無寐愛此一寸燭展卷乍沈吟開軒屢躑躅

我唱和者誰淒其感幽獨別時秋林下錦纈黃映綠幾日不上樓敗葉忽已禿

悲風颯然起槭槭響枯木靜覺流光移暗傷懷抱觸小僮強解事隣釀蕝新熟

酒罷還夢君湖心浪如屋

重登莫釐峯望吳興諸山

吳會諸峯繞作環荆溪百瀆瀉成灣西南遠景新收得一髮螺青是弁山

從渡水橋步行至武山小憩吳氏園亭十四韻

過橋纔半里空闊得平原野艇簞簞渡斜陽穉村晚來魚論斗

吳志云吳俗以斗論魚二

斤半爲一斗

僻處犬依樊歲稔松醪賤秋辭社鼓喧草根驚雉起

洞庭志東山有雉而無兔西山有兔

而無

木末見鷗翻面面帆移岸家家水到門泉清能止渴山淺易尋源又接攀

躋路重窺種植園罷衣橙刺密耀眼橘頭繁舊葉荷傾沼新泥菊上益苔滋行
每滑石好坐能温隔竹傳壺箭隨花倚畫軒何須問生理卽此是仙源遠色蒼
然合歸途月有痕

欲往豐圻看楓葉爲雨阻

山中築居如築城往往人家背山住連街接巷比通闐雖有林巒無曠趣敞雲
樓東鴨脚木亂葉成堆稍通路此中合着杜門人一月出遊凡幾度我生夙嗜
久撥棄祇有吟情剩如故頗聞人說豐圻勝況有丹楓照秋暮魚蝦市遠風不
鯁橘柚園深香作霧朝來折柬約溪友預飭晨炊治遊具住山復作遊山人此
事寧防天亦妬初看鬢鬣雲似墨忽聽淋浪雨如注客言万事難逆料投足無
端動關數豈知勇怯總由人老嬾逡巡坐自誤憶當涉世氣鹵莽浪走風塵飽
霜露衝泥驢背不自惜到此翻令限跬步天工作意不肯晴明日披蓑杖藜去

大雨同胡朏明閣百詩登湖樓

大聲拔湖洪飛上巨鯨背歎空作猛雨倒射怒百倍
木助一喧掀騰走羣怪樓孤若搖動勢已岌岌殆雲頭
排窗來山影忽在外目存思欲絕境變奇乃最我詩
苦難工傑句應有待

順風渡湖瞬息抵胥口

匹練掣枕痕虛弓曠帆勢不知小榜迅但見青山逝
孤塔表靈岳卓針辨湖滋須臾忽到岸轟轟在天際

虎丘晚泊

山淺橋平水一隈幾株紅樹寺門開從看小景如盆盎
新向湖天放眼回

拔白詩

并序

昔蘇子由有白髮近二十年虔州道人王正彥教令拔去以真水火養之從其言數月而白髮不出因作詩自言拔白之驗余今年忽有白髭二莖攬鏡鑷去且三月矣竟不復生喜事有偶合者因用其意作詩一章然養生家言

僕固不解也

人生正庭樹官骸乃皮膚樹有花與葉人有髮與鬚花葉本整榮鬚髮那不枯
我今過四十貌作山澤臞憂患煎心神奔馳形軀早衰理則爾何用長吁嗟
雙鬢久星星見慣習與俱白髭忽新變刺眼生躊躇我欲撚使斷苦吟徒自愚
我欲媚後生染之非丈夫不如竟拔去誰能忍斯須初若蠹蝕葉幾片離根枝
又若耘除稂良苗漸蘇蘇爾來九十日萌蘖喜絕無養生素乏術寸田任榛蕪
何當鬪黃精白髮併掃除

朱雪鴻移居詩和黎洲先生

蘧廬天地總羈棲爪跡何煩苦印泥招隱莫分山大小卜居難定濃東西一舟
最穩裝書重四壁初安待客題終勝梁鴻依廡下年年井臼累山妻

雪夜發玉峯數日前沈昭嗣呂山瀏顧書宣先往洞庭作詩寄之

落木灣頭雪灑燈臥聞漁子尙牽罾寒光潑被夜如月野水割船冬始冰風逆
不知何日到山高宜及此時登湖天霽色詩兼畫待我舟中酒二升

從橫塘晚至木瀆舟中寒甚

西北風狂野氣昏
船窗擁火取微溫
殘陽正墮塔邊寺
薄雪未消湖外村
木盡脫時喧鳥雀
稻成堆處散雞豚
可憐歲晚不歸客
對景躊躇思故園

雪後曉渡太湖

黃蘆吹斷黑頭風
寒日初生血樣紅
一片湖山新着色
萬螺浮白碧壺中

次韻答趙蒙泉閩中見懷之作

得喪年來已貫經
忽披佳句又心驚
計疎更事多成悔
身賤依人自覺輕
壺口欲從敲後缺
劍鐔猶發扣時鳴
來詩有先生豈以不平鳴句
短檠牆角差難棄
賴是看書眼

尙明

王令詒自閩歸出示途中見寄二章次韻奉荅

船頭船尾榕陰綠
城北城南荔子紅
懊惱此中多賦別
勝遊從古幾人同

右答南浦

見寄

自攜驢券出都城
草草裝隨短策橫
失路歸添遊子淚
加餐書荷遠人情
愁隨

越鳥方南向懶趨邊鴻又北征不用苦教詩激楚漫天風雨正秋聲

右蒼晚泊見懷

送山瀏自洞庭歸塘西兼寄張介山陸厚容金子由諸子

無多唱和留君集來往真如相避然一葉驚回三載夢兩萍漂散五湖天新書
著罷從人笑善病同時得婦憐

山瀏聞嫂夫人抱病已亦致疾

好向橋西呼酒伴放狂作達過

殘年

雲石菴和書宣韻

一徑入雙塢

菴在大塢小塢兩山間

遙從澗道求泉枯行汲遠竹密得窗幽日氣通停午

濤聲捲上頭踞高真得勢矮屋也如樓

白龍泉和沈昭嗣韻

半嶺通湖眼閒僧護井湄自能清徹底何用砌成池鳥道尋難到龍湫怒或移

不知風雨候可有氣如絲

來鶴樓和韵

樓址為某姓葬地

舊日松楸廢何年笙鶴來樵人憐葬域山鬼避香臺峯勢重重合湖光灩灩開

步虛人罕到猜是小蓬萊

題書宣小影

十萬青鸞尾搖竹映得詩人鬢毛綠此中可少三間屋竹西三月桃花紅前村
後村烟濛濛此中可少一扇篷遠勢兼收隔江塔指圖山也與君作詩論畫法借君
門前來放鴨

書宣以藥酒一罌見餉賦謝

北風夜半收鳴鼉冷光浸日湖不波對門老樹盡僵立枝顛斗大鵲作窠山人

畏寒臥復起排籤十指無人呵雲間陳翁

山農

好事者乞與方法招詩魔酒材難

致藥料貴正苦羞澁囊無他感君餉我分一器何異良劑投沈痾甕城新開香

繞鼻瀉以碧椀承紅螺甘分沆瀣光琥珀村醖不數黃如鵝卵時小酌午未醒

挾纖纒乍回陽和蓬蓬入胸聲自覺粥粥浮面顏微醺枯腸一洗枵藥出老眼

亂瞥昏花過肩高尙吟薄薄酒耳熱漫作烏烏歌井湄效箴咲揚子春色可賦

煩東坡犀首達生坐無事衰絲遣日知亡何有生得此亦過分況敢嗜好窮搜

羅偶將一醉累良友亟饋莫必惠已多預愁竝罄唇燥挹漿那得翻天河

書宣次韻見蒼復倒用前韻作一章邀余繼和時書宣將歸揚州兼以

贈別

君才如漢江淮河駕天輪浪豈患多坐批百家目炯炯行貯四庫胸羅羅詞源
獨騁曹植富餘地不量繼者何金丸脫手最輕捷快馬直下胭脂坡朝來赫蹏
急傳示白雪竟壓巴人歌我時解鞍息蹇足臥看縱轡奔騰過吟情欲探酒力
發小戶一盞熏顏酡平生有作每倔強音調太急絃難和醉來反嫌天地窄局
促未免愁籠鵝團團陳跡走循磨眩眩纈眼光旋螺爾來檢點稍知悔思以勺
水湔前痼可憐故態時復作形雖近放心靡他人生有情會有癖湛詩麴蘖俱
成魔何如牢守昔賢戒不吟不醉從嘲呵逝將嗇養全晚計野蠶簇繭蜂藏窠
子今勇決乃過我氣盛不怕江翻波臨行舉杯懺口業拔劍倘斫生蛟鼉

以藥酒分餉唐實君吳西齋再疊倒韻索和

鴟夷皤腹鼠飲河就中滿貯得幾多玻璃万頃吸不盡霜風吹淺如碧羅詩人

氣麗言語大鑄琢造化將誰何婁東二生我同調得第厭上金鑾坡場來忘分
 更莫逆銅斗許和寒郊歌湖心淺山住隔巷衝凍踏月頻經過所慙才分非爾
 敵頰面未飲長先酖愁腸酒肺互撐拄正賴藥味相調和長瓶分餉良有以願
 奢似挾山陰鵝鷓鷀聊足注半杓鸚鵡恰好浮雙螺便從唐侯促佳句
實君許題放鴨
圖詩向未至 更祝吳子蠲微痾時西齋屬微疾 號呶當筵誰是主剝啄扣戶人非他林魁木
 客盡逃避氣豪橫欲駟羣魔此間差無俗物擾尚有亭長能相呵懷哉歲暮盍
 歸去坐看日夕雞棲窠小槽溜溜聽壓蔗饒涎亂湧珠跳波床頭一壺堪醉倒
 不知門外傳更鼉

題鄒毅仁書劍圖

學書差足記姓名學劍無過一人敵英雄竟以成敗論二語千年供指摘我持
 此論君勿疑潦倒粗言身所歷方當出遊氣盛壯逸足誰堪受羈勒有文曾詡
 弔戰場有力能誇控鳴鏑蹉跎祖述難着鞭爛熳陳琳徒草檄收身十載赴場
 屋往往雄風避雌霓眼看騏驥盡先登駑鈍悲嘶仍阜歷天涯行旅慣黑瘦世

上男兒多白晷讀書擊劍兩無成
鄧禹吟人終寂寂子才去我固十倍射扎穿
楊準懸的胡爲垂翅亦襤褸予美誰倚
叩有鷗三年奏牘困方朔五十吟詩吟
高適馬應換妾刀贈人龜手如何學
泚泚薄田可耕池可釣良耜屢屢竿籬籬
還君此畫一展然寒盡知年不須曆

梁溪馬碧滄索題桐山草堂

吟徧峯頭又水涯九龍歸夢隔煙霞
期君早種十年樹待我來看三月華
藥錄欲傳須手著琴材若中有人誇
不然斗大成何用万里丹山客是家

諺云梧桐大如斗

人出外走

題鄒舜五采蓴圖卷子次陳眉公舊韵

敏舷聲動吳歌起沙戶生涯雜魚米
此中有蓴誰識之埋沒蒼烟白蘋裏
湖波太淡無鹽豉葉自青青莖自紫
脆如雪耦滑春冰異產寧教鑿紈綺
紅鱸四腮差可配二老朝來動食指
弄潮踏浪去何憂占斷湖心一片秋
百年好事留詩畫從此流傳到武丘
人間網利多堪慮莼擔年年入城去
未應澤畔少清流却

與貪夫供七箸

太湖中產蓴前此未之聞也天啓壬戌秋武山鄒舜五與陳眉公始採而食之眉公因繪圖以紀其事

發東山至石湖舟中大雪與蒙泉雪園分韻

忍別東山去依依尚有緣雲沈上方塔雪重石湖船密坐可無酒敝裘終勝絲

范村留故宅欲訪向誰邊

宋范致能居此地名范村

雪夜泊胥門與蒙泉抵足臥

野泊五湖東迷漫雪滿空水明千雉白人靜一燈紅亂櫂雞聲外輕寒酒力中
殘年歸夢闊惆悵兩心同

雪後至閶門換船

北風吹樓臺白日雪打面閶門十萬戶咫尺不可辨歸舟一葉輕欲與嚴寒戰
所欣吳中稔酒價冬來賤我裘雖云敝一醉煖堪戀尚有無褐人忍饑冒霜霰

吳門橋阻凍

白日淡無色北風吹作陰浪增冰力厚橋插凍痕深已近故鄉路徧傷獨客心

是日蒙泉歸嚶城

鄰船如比屋兒女盡吳音

入胥門訪薛孝穆不值留詩示之兼簡許暘谷錢玉友

風止澤腹堅篙輕不可鑿短篷壓頭臥竟作三日惡買客聚連檣荒灣比村落
人羣自歡咲而我無處著遂訪薛逢居衝風入南郭初來殊奮迅欲去轉寂寞
窮途所向昧妄冀朋友樂錢許初北歸合并有成約十日前玉友暘谷自燕中
返虞山期於吳門相晤亦
爲冰雪所阻參辰在咫尺矧乃道里各天寒歲徧臘何以慰離索興盡返孤舟獨吟
還獨酌

打冰詞

寒光射川如浴鐵千艘萬艘陷頑石鑿山通道古有之河伯憑堅蟻難穴官船
自倚人力強冰椎亂擊船兩傍船頭乍開船尾結去岸却泊河中央篙師咲謂
官勿爾世路升沈總如此若將人力與天爭倒捲天河應瀉水

阻冰七日始得發舟

筮易玩其占七日當解凍朝來覘風色東面柳初弄天行既來復人力漸可用
南船鑿冰來銀浦作流汞小僮報奇事水活鱗甲動老夫亦欣然私喜言幸中

敬業堂詩集卷十三目錄

勸酬集

元夕同顧伊人張昆詒集徐敬思宅分得燈字

崑山一名玉峯周圍二里許似累石而成者唐張祐孟郊有詩與蓋嶼所

畫山圖同留慧聚寺中向有石刻宋皇祐中王半山以舒州倅至縣相

水利登山閣二公詩次韻和之時稱四絕淳熙中寺燬於火自唐以來

名流題詠及楊惠之所塑毗沙門天王像

或云張愛兒所作

李後主所書榜額

一掃無餘今準提閣壁間石刻三公詩乃後人補刻非故物也正月十

六日同張昆詒盧素公登山感懷往蹟為詳考本末并系以詩

德尹四十初度二首同潤木作

題又微姪投壺圖小照

初夏園居十二絕句

橘薪

新竹

布幔和德尹二首

梅雨連旬河流暴漲偶同德尹泛村船入菖蒲港

雨後

衰至

庭前草花與德尹分韻四首

夢中得絕句似小遊仙詩醒而錄之

舟曉次德尹韻二首

次韻答陸柱瀾見訪

程西村以如圃詩索和次原韻

七夕同德尹潤木作禁用故實

茨菰見唐人詩如白香山云渠荒新葉長慈姑朱放云茨菰葉爛別西灣

劉夢得云菰葉風開綠剪刀未有及其花者余盆池偶種一窠立秋後

忽發細蕊每節叢生花開純白色如玉蝶梅差小頗有清香因作一首

以補詩家之缺公情之詩惠研谿庶常從京邸寄到吳超士見

懷詩四章次韻奉酬並簡研谿種菊詩示克建克承兩兒時余將往

湓城夜初涼

湓城之遊未果作詩示德尹兼答朱恆齋太守

題馬漁村行路難小影

送楊次也入都並簡尊甫太史公三

首

竹溪書屋為又微聲山兩姪賦三首

沈稼村太史招飲耿巖草堂

墟墟舟中口占同德尹作二首

嚳城孫愷似編修欲行善於其鄉竟遭吏議今方罷官就訊吳中相遇感

憤成詩

胥門曉發

長水塘夜泊

庭桂初開隣人有來乞花者

豆棚爲風雨所壞

題高錫純羽士畫像

八月十五夜與德尹桂庭對酌三首

東田看稻

沈孟澤索題小照二首

聞村家打稻聲

九日寄諸弟湖上

重陽後二日雨霽行園

鞭筍

收芋

立冬

落葉詩五首和趙漁玉范用賓

欲遊雲岫不果戲示德尹

題曹希文被蘭圖

後落葉詩三首

題高江村先生泛槎圖小影次韻

雪中呂山瀏見過

曹希文以端研四章索和即疊原韻

食齋

冬夜宿古衡山先奉政公祠下感賦

除夕示德尹潤木信菴四首

對雪

立冬

東田

敬業堂詩集卷十三目錄

東田

入以

豆

其

其

其

其

其

敬業堂詩集卷十三

海寧 查慎行 悔餘

勸酬集 盡辛未 一年

己未以後衣食奔走與德尹出入如相避庚午偪臘歸自具區德尹適從
洛中旋里除夕酌酒相勞蓋十二年無此樂矣爰相約為杜門計盡辛未
一年凡得詩如干首

元夕同顧伊人張昆詒集徐敬思宅分得燈字

自到君家飲量增也教小戶罄三升笙歌院隔新翻曲書畫屏開巧樣燈知有
清光終讓月可無佳句冷如冰誇張節物誠多事誰似詩人范致能 范石湖有 上元紀吳

下節物三 十二韻

崑山一名玉峯周圍二里許似累石而成者唐張祐孟郊有詩與蓋嶼
所畫山圖同留慧聚寺中向有石刻宋皇祐中王半山以舒州倅至縣
相水利登山閱二公詩次韻和之時稱四絕淳熙中寺燬於火自唐以

來名流題詠及楊惠之所塑毗沙門天王像或云張愛兒所作李後主所書榜

額一掃無餘今準提閣壁間石刻三公詩乃後人補刻非故物也正月

十六日同張昆詒盧素公登山感懷往蹟為詳考本末并系以詩

吳中園圃愛假山家家畫藁樵荆關此山本真翻似假怪石疊起孤城間奇峯
尤在西南頰縹緲玲瓏還戍削遊人仰視一綫天信有孤雲生兩角幾輩留題
感昔賢曾聞摹勒載名篇崑岡烈火精藍盡何物能為金石堅人間假合夫何
有差是令名堪不朽我詩寫意直取真嗤點還須防衆口

德尹四十初度二首同潤木作

四十平頭齒未頽誰教辛苦逐風埃祝君此日無多語正要飛騰暮景來少陵詩四

十明朝過飛騰暮景斜

蒲柳桑榆各老成一杯相屬話生平十年多少回頭事我是蘇家白髮兄用東坡詩

子由詩中語

題又微姪投壺圖小照

五經一笥咲老韶長養侍兒如許嬌卷衣風裏聽傳箭近前爭賭蓮花驍

初夏園居十二絕句

人言瘦地差宜竹鄰舍曾分一本栽尺八梢溝攔不斷狂鞭攙過菜畦來
牡丹不稱種村莊開到春殘盡野芳椿棘補籬成片段丁香香過木香香
亭臺廢後變溝塍欲置茅齋力未能大抵爲園多借景別家高樹挂朱藤
方池一畝萍初合四月中旬未有蛙簇簇銀針齊上水綠楊影動散魚花

莎軟鋪茵纔沒膝樹圓擁繖正遮頭如花流過碧池去忽聽一聲黃栗留

詩疏黃鳥

黃鷓留也或謂之黃栗留

長年因病醫方熟小草隨時藥料增趁取連朝好風日帶花收晒鷺絲藤

閏年留竹苦防蠹辰日種瓜須早澆愛花更作晚秋計老瓦盆邊分菊苗

鷺粟着子米囊小蠶豆褪花皂莢成莫欺老圃不工畫小碎詩篇如寫生

去秋梧子收不盡旋向根邊兩葉生保得主人長閉戶四三年便看陰成

自蟠老榦自抽條長養仙家枸杞苗不似茗華難獨立附他喬木號凌霄

鳴聲上下羽交交雀鷖初安樹一梢啼殺斑鳩生計拙將雛時節定爭巢
頭眠已過二眠新蠶候參差雜四鄰一月往來渾斷絕隔離時見采桑人

橘薪

生意千頭盡園租五畝荒子孫貧敢計奴婢價誰償入室鉤衣破為薪刺眼傷
更愁秋冷澹屋角少青黃

新竹

插槿三年與作樊又添客土護深根主人愛竹老成癖看笋出林如子孫
二月得長

孫名興祖故及之

布幔和德尹二首

細竹輕竿稍出檐空庭得蔭比松杉賽他畫舫齋中臥平展江心一面帆
背日開簾更覺涼午陰屋角漏微光呼兒勤掃蜘蛛網方便花時蝶過牆

梅雨連旬河流暴漲偶同德尹泛村船入菖蒲港

雨急溝渠漲怒生再添一尺與橋平無端驚起江湖夢聽作船頭放牓聲

雨後

便從一雨望豐年大抵人情慰目前我比老農還計短只貪今夜夜涼眠

衰至

中年事事防衰至不獨侵尋感歲華誤去黑鬚因鑷白旋揩昏眼又生花顏唐
老境詩無格汗漫遊蹤累有家合是歸時歸亦得趁收麥豆種胡麻

庭前草花與德尹分韻四首

輕刀勻翦翠葱龍別圃移來土最鬆爾纏絲附枯竹屋低庭小不栽松

蘿女

小兒稱長老稱翁比似花冠約略同消得閒人閒處看可憐小草亦爭雄

雞冠

羣羣紅白隔窗紗么鳳飛來冑鬢鴉老眼自看還自咲種花猶種女兒花

鳳仙

位置瓷盆手自親暑風香透色如銀暫歸我已家如客還與南花作主人

茉莉張叔

敏呼為遠客苑石湖
詩南花宜夏不禁涼

夢中得絕句似小遊仙詩醒而錄之

東海東頭拾火珠抱來徑寸豈論銖兒童莫逐黃金彈笑向扶桑打赤烏

舟曉次德尹韻二首

螢尾孤光合復開，灣頭風急却飛回。
菰蒲深處一枝櫓，搖入漁人夢裏來。
狂蛙鬧雨羣千百，遠火疑星點兩三。
忽聽雞鳴鐘渡水，有人家處有茅菴。

次韻答陸柱瀾見訪

旅塵狂走十年餘，每到還家歎瑟居。
髮變一頭俄向老，草荒三徑只如初。
傷心短檠經時泪，外舅射山先生已下世覆手貧交屈指疎。
多謝新詩猶念舊，可能懷抱對君

抒

程西村以如圃詩索和次原韻

人境何曾礙結廬，一椽朴茂似園居。
勸荒自作披榛賦，得法新傳種樹書。
老圃閒談真可聽，比隣初約莫教虛。
笑他亭館多何益，無福能消鼠壤蔬。

七夕同德尹潤木作禁用故實

眼中七度如梳月，又帶桐陰入小樓。
懊惱一天星似火，閨年今夕未交秋。

菰菹見唐人詩，如白香山云：渠荒新葉長，慈姑朱放云：菰菹葉爛別西

灣劉夢得云菰葉風開綠剪刀未有及其花者余盆池偶種一窠立秋後忽發細蕊每節叢生花開純白色如玉蝶梅差小頗有清香因作一首以補詩家之缺

舊葉復新葉碧莖忽抽芽誰將綠剪刀剪出白玉花水邊有秋意涼蝶來西家

惠研谿庶常從京邸寄到吳超士見懷詩四章次韻奉酬並簡研谿

故人隔座呼同舍花底移樽醉小樓

余初識超士於研谿館舍

散作兩萍漂水面遠煩尺鯉

到沙頭狂名自悔逃難穩歸志差堅挽不留一窖黃塵殘夢外爲君牽動十年

愁

飄瓦虛舟豈有因誰當入爨惜勞薪潛形那避含沙射沈璧何來按劍嗔

來詩言及

己巳秋飲酒得罪事故云

桂樹叢荒招隱伴楊花風墮倦遊人白衣蒼狗須臾事醉眼看來

分外新

黃羊枰上守枯碁訝許人間獨亢眉一戒早開元亮酒半年遲答暢當詩迴腸
徑路梯空險徹骨冰霜造物慈羸對村童開口笑竿頭新作釣漁師

臥聽門前剝啄聲書來猶勸束裝行貧逢閏歲增薪米病過新秋減送迎涼雨
半窗初到竹碧萼千里正宜羹也應世味多忘却除是難忘故舊情

種菊詩示克建克承兩兒時余將往潞城

擾擾十三載孤蹤混泥沙及歸翻苦閒何以銷年華種菊亦偶爾惜此徑寸芽
春苗不分栽秋至焉得花

惡草既親鋤清泉亦手灌却將四體勤覬博兩目翫舍之忽將去笑別東籬伴
根是老人培花從汝曹看

夜初涼

人靜覺夜涼書帷傍清檝不忍陷秋蟲吹燈還就月

潞城之遊未果作詩示德尹兼答朱恆齋太守

貧賤胡可居無端兩樵悴侵尋歎末路鹵莽悔初志豈無骨肉恩聚少別苦易
分馳十年外廬舍任榛刺殘冬偶同歸草草如旅次杜門得半載村巷傳異事
不知相見驩中有思親淚兩櫃猶在堂牛眠指何地堪輿及日相時俗多拘忌

吾寧葬吾親忍規子孫計所嗟
艱物力動輒故人累潯陽賢使君清俸煩遠致
有生迫孤露久矣衆所棄誰能念窮交
尙舉麥舟義當之恐過分一感再三媿
佳招況踰期恆齋來札約余季夏至溢城
欲往未得遂我貧荷見諒應并諒此意鴻雁滿江湖詩成特先寄

題馬漁村行路難小影

狂瀾打頭山壓面
跼蹐乾坤縈一綫
我行畏路知路難
談虎還防君色變
君家門前池水清
對門山與樓簷平
此中徑路坦於掌
作底胸次添崢嶸
畫師寫圖如有託
洗耳聽琴差不惡
可憐冰雪七條絃
千萬勿彈蟬捕蟬

送楊次也入都並簡尊甫太史公三首

八座重親未白頭
角巾里第最風流
孫枝本是階庭秀
顰悅看他又出遊

石渠天祿近何如
欲讀應無未見書

用黃香傳中語

但約南船多載酒
對難官燭看銀

魚

時端木嫂夫人亦北上故及之

交情到爾凡三世
得路憐余共一心
重向別中留望眼
別愁終淺望終深

竹溪書屋爲又微聲山兩姪賦三首

竹柏陰交槐柳陰疎籬一帶棘除針自從新改橋邊路大費花時曲折尋

記得當時非角遊書聲愛聽出林丘兩家前輩多凋謝又對兒孫感白頭石丈兄與

先君子情好最密每過裕菴余兄弟未嘗不隨行也

夕火晨香共一龕閑隨清磬出花南居人盡識藏書處碧蘚蒼藤白石菴用李公擇

事

沈稼村太史招飲耿巖草堂

十里秋光雨洗新稻花香路淨無塵門依曲沼難通權居近東家愛得隣却對
杯杓寬禮數每聽談論長精神回看宦海波濤闊轉羨收帆到岸人

墟墟舟中口占同德尹作二首

水面浮漚的的圓采菱歌出采蓮船此歌賴是吳兒唱若是吳孃更可憐
樹低草沒一叢叢曉日橫生白蕩風拍岸水痕高一尺布帆抄路稻田中

曠城孫愷似編修欲行善於其鄉竟遭吏議今方罷官就訊吳中相遇

感憤成詩

蒼狗如雲極可哀，危機翻自詔恩來。
家承忠孝身尤重，禍起衣冠勢易摧。
善不可爲寧論惡，人皆欲殺我憐才。
乾坤直似蝸廬窄，懷抱除非醉始開。

胥門曉發

月落日未升，大星明一箇。
舟人貪早起，客子便晨臥。
忽聞水氣腥，知有漁榔過。
長水塘夜泊

高埭接長橋，橋形落蠓螭。
市喧夜微息，犬吠船猶動。
可憐一川月，細碎如潑汞。
忍負好秋光，推篷兀殘夢。

庭桂初開隣人有來乞花者

吳閩十日遊，歸櫂及秋仲。
入門視庭桂，破蕾暗香動。
常時花最早，七夕露華重。
苦怪今年遲，曾經上年凍。
西風不吾私，吹散香滿街。
頗有好事翁，叩戶乞清供。
披衣揖使入，手折寧煩送。
譬如根株本自隣，家種我生無長物。
有者皆可共配花，稱主人毋乃被嘲弄。

豆棚為風雨所壞

平生乏鮮肥肉食非所慕偶然營口腹蓄念計必誤春種瓜豆苗愛養以孩孺
插竹就茆檐縛繩使之固初看弱蔓引漸喜眾葉布絲瓜夏蚤結落蒂甘於瓠
菹豆開獨遲白花待秋露及茲綠垂莢採摘在晨暮夜來風雨狂傾倒莫支柱
老饕自安分物理庶可悟托名得蛾眉本草白菹豆一名蛾眉豆吁嗟難免妬

題高錫純羽士畫像

猛虎入羣牙爪悍眾蛇齧索懸石斷平生却笑費長房學道工夫纔及半葛陂

拄杖辭壺公隨身霹靂搜蛟龍道人有道兀不動心在一輪圓鏡中後又題云圓月當空

光生何處撥開雲霧請師全露

八月十五夜與德尹桂庭對酌三首

半年門逕草芊眠除草開場為月圓月正當頭花照眼此花原是月中仙

昨日方愁雨打扉夜來不料有清輝可憐萬事盡如此居者別家行者歸時潤木獨

留邑中

看來南北東西月只與今宵一樣圓却對團圓感離別人生能幾十三年

東田看稻

雲氣散如濤秋田罷桔槔漲痕侵岸闊稗草比禾高米卜豐年賤農憐瘠土勞
預期營一醉歸去滌新槽

沈孟澤索題小照二首

桐陰寬罩一方苔流水聲中洗耳來若是補圖須補竹琴材已具少簫材

神理真傳老畫師毫端躍躍動須眉人間別有膏肓病看取先生袖手時

沈精于醫

聞村家打稻聲

鵲豆籬邊捫腹行惰游筋力負歸耕自慚飽喫豐年飯閒聽隣家打稻聲

九日寄諸弟湖上

如此秋光悵不同湖天無雨又無風白蘋未改空洲綠烏柏長先萬木紅好事
誰還能送酒浪遊吾轉悔飄蓬兩峯緣淺登高會懶到今年似蟄蟲

重陽後二日雨霽行園

兩尖家門山登陟昨乃阻曉晴已過節與盡力難努我衰萬事廢所樂在蔬圃
早菘種旬日行列紛可數蟲來蝕其苗饕餮猛於虎一寒爲掃除正賴夜來兩
宿根發餘潤新葉換翠羽池西木芙蓉紅白相媚嫵下有二寸魚花影嚼復吐
何來兩鷓鴣雙翅勇自鼓公然啣魚去飽食不避主可憐病橘林凍裂上年土
坐視千緡荒官稅私莫補天心有傾覆肯諒貧家苦物理苟不齊吾寧守終窶
鞭笞

雨後竹走鞭鈴塢瘦相引小僮撥土裂鬪取如拾菌烹之媚盤餐下箸吾未忍
寸鞭何足惜惜者來年筍

收芋

芋肥莖葉長芋瘦莖葉短率以鹵莽報吾願良易滿年豐百物登磊落光堆盤
其魁蹲如鴟小亦伏殼卵

立冬

節候攙暮秋初陰猶未壯南檐白日影入室已一丈門簾布差密窗紙油逾亮

坐看佛前香無風烟縷上頻年遠行役浮氣逐塵埃
裘茸插兩手故與嚴威抗
如今矮屋中尙欲設屏障寧非老將至嗜好改前尙興到聊復吟都忘往來相
落葉詩五首和趙漁玉范用賓

靜中初有聲策策起林薄俄聞響簷瓦急點疑雨作開門日滿庭始悟風隕籜
徐行踏殘葉仰見巢枝鵲鵲噪一何喜鴉鳴一何惡客緒本無端誰禁對搖落
好景忽潛移丹黃換青綠丹黃亦隨盡假以絢吾目失蔭無密林蔀家有豐屋
嚴霜挾時令顛顛非一族何殊百萬師委甲填坑谷

摧壞寧自主出林竟如狂初來聚堆阜倏忽還飛揚不妨穿我籬慎莫打我窗
籬穿可徐補窗破風滿牀

春花得人憐飄蕩尙苦遽天公肯汝惜狼籍等敗絮從來擇庇羣多在成蹊處
君看西家葉又過東家去

荒居環雜木最怕冬來風如駕一芥舟震撼驚濤中幸賴杜陵老前月已耳聾
人生有聞見榮悴方無窮

欲遊雲岫不果戲示德尹

吾鄉鷹窠頂陡起東海邊飛鳥到山止東南水浮天常聞十月交登臨得奇觀
天文直角氏日月行同躔憑高視倒景長在寅卯間初生朏一魄摩盪蛟龍淵
須臾一綫紅迸出白玉盤嗔然劈作兩對射光相穿白者忽潛形孤輪躍紅丸
是名爲合璧故事山僧傳山僧老白頭歲歲居山巔目擊凡幾箇流傳徧人寰
嗟我與吾子好奇結前緣足跡半九州所到窮山川如何名勝地近失耳目前
昨聞大阮介菴語便思陟巒岢朝來復逡巡相對亦可憐勝遊無近遠人苦不
得閒既閒或少伴得伴長無錢乃知意興豪必及少壯年一慵百事廢豈獨登
山然

題曹希文被蘭圖

噴水澆花曉尙寒試憑纖手摘來看神仙舊是瑤臺伴再到人間合夢蘭

後落葉詩三首

衆葉四散飛獰鷗亦暫停枯叢剩數點有如塊粘萍又如將曙天尙帶三五星

鳥雀聚疎影夕陽到空亭時還墮一片夢化蘧蘧形

向榮旣欣欣黃落亦槭槭却將傍觀意爲爾生分別何如兩相忘造化本無迹
山僧撥葉至或嫌門徑窄吾嬾不出門門前任堆積

我吟落葉詩如與落葉語年年走關塞搖蕩愁見汝馬頭聲蕭蕭打面風帶雨
吳霜點兩鬢歸作故林主故林豈無春過眼同逆旅後時感獨立孰是歲寒侶
題高江村先生泛槎圖小影次韻

葛陂龍化杖如仙欲捲銀河瀉作泉除是先生能鎮定波濤人海正粘天

雪中呂山瀏見過

去年別君處吳中正連陰雪花大如席開船太湖心今年君過我海天又寒凝
去聲輕冰觸篙破清脆聲可聽一年復一年能禁幾回老與君迫暮景爲別常恨
早我有一斗酒可以禦北風酒熟挽不留問胡太匆匆君言旣相見興盡我當
去正如上番來彼此兩不遇

去冬山瀏過里中
余留洞庭未返

曹希文以端硯詩四章索和卽疊原韻

溪光如眼綠潭潭洗髓何辭一再三碧落數星瞻夜斗冰綃半尺翦春蠶
分琥珀知難並匣配琉璃定不慚三十六鱗煩寄取好磨濃墨寫雲藍
用段柯古詩中事

紫雲一角割天南秀色猶看帶嶺嵐束峽波濤時一湧濕毫風雨潤長含來疑

甕社光吞月去恐延津勢躍鐔神物自來須善保有求容易遂虞曇
時有欲得宋齋執法

硯者故及之

巖洞煙霞笑未揮欲隨翡翠竟巢南筆因興到詩情淡嗜與年深石性諳圭璧

方圓形總肖龍蛇蟠攫力誰堪兩都賓主如相見淬瑩才鋒出健談

雅好雖多不厭貪眼中似爾亦奇慙一生自許癡無偶兩手從誇硯必三
古人以貪

多者為兩手三硯希文蓄石最富故云俗論掃空和氏癖癖香爭識米家菴新宮銘草誰先就仙

掌摩挲與細探

食齋

朝來食指無端動走覓隣園又一奇薄雪乍消青冒土滿籃香齋未花時

冬夜宿古衡山先奉政公祠下感賦

路滑冰堅賴短筇到來支枕榻纔容透窗燭影寒於月拏雪松枝健比龍老屋
將傾傷世澤墓田久廢媿春農十年塵夢憑呼覺金粟山頭一杵鐘

除夕示德尹潤木信菴四首

前夜雷霆了不驚

三日前
大雷電

靜中擾擾惜羣生一村野犬多狂走多事隣家爆竹

聲

山妻椎髻子頭蓬布褐隨宜稱老翁特與孫雛破年例抱來膝上換青紅

從前筆墨粗償債削藁存來得幾何剛是今年無可汰應酬詩少唱酬多

村巷無雞漏板遲漫漫長夜夜何其野人預辦朝眠熟怕作新年日蝕詩

明年
元旦

日
食

敬業堂詩集卷十三

卷之三

...

...

...

...

...

...

...

...

...

...

...

...

...

敬業堂詩集卷十四目錄

溢城集

禾中與德尹別

吳江留別張弘蘧庶常

夾浦橋阻風

山塘晚霽

曉渡西沈回望宜興縣郭

高淳

渡蕪湖關

荻港人家杏花

雨中過銅陵

雨後望九華山

荷葉洲對雪

雪晴池陽舟中

大風至劉婆磯

題樅陽旅壁

田間先生聞余至自青山命駕來會喜賦

花朝晴示僧道楷

自樅陽至楊樹灣道中即目

三角潭

桐城謁左忠毅公祠

過田間先生山居相留信宿出示藏山集再賦二詩博和

三江口朱主山大雪渡馬當

順風揚帆時閉目靜聽如空山梵唄殊有會心

與九江太守朱恆齋

二虎歌

廬山之遊未果和灌園山舍西門之役既連斃二虎今復獲虎子

大二呂灌園作後二虎歌再次其韻

楊花同恆齋賦

初聞黃鸝次灌園韻

同呂灌園鄒仙來諸君遊甘棠湖登煙水亭次壁間舊韻

琵琶亭次郭明復舊韻

江州雜詠四首

余作江州雜詩灌園既垂和續為潯陽行感慨淋漓讀之使我心惻因推

本其意再成長律四十韻首言風土次序東晉以後迨明初一一竊據

事終於寧南乙酉之禍此州被亂情形始末略備休養生聚其在斯時

乎並邀恆齋太守同賦

石鐘山

月夜自湖口泛舟還潯城同恆齋太守賦

春晴曲效温飛卿體

三月十七夜與恆齋月下論詩

魚苗船

曉晴咏恆齋庭下芭蕉

九江向無鱖魚網戶忽獲一尾以饋太守晚餐分噉作三絕句

署庭蓄錦雞且一年朝來忽飛去恆齋有詩屬和

明日吏人以錦雞來視之即昨逸去者再作一首

初夏坐煙水亭望廬山二首

余方輯廬山志擬入山訪舊蹟頗爲

雨阻恆齋有作和之

芭蕉恆齋再索和

夜夢入廬山桃花滿谷一僧指云此杏林也因誦樂天遊大林寺絕句夢

中了了醒而以詩紀之即用白韻

午酒初醒

生日書感

梅雨二十二韻和灌園

雨中廬山僧書至

階除積水課力疏下流放之射圃隙地

曉吟

次灌園潯陽唱和賦感見贈二十四

韻

江漲八韻

晚晴

連日苦雨江勢轉盛聞小池口一帶

已成巨浸感賦

午後有人自廬山來云昨日白龍潭

起蛟故水暴漲

曉霽望南昌歸信

桐陰和灌園

試弈次灌園韻

夜熱不成寐聞秋蟲聲

一草亭後補築土牆同灌園越秀賦

月夜得南昌消息知恆齋歸期未定

蟬蛻和灌園韻

除草

灌園用瓷盆斛水浮以花片畜魚苗其中作案頭清玩索余賦之戲成二

絕句

露坐待月

苦旱

起最早

冒風渡湖口

立秋夜彭澤舟中

雨後登彭澤佛閣

彭澤縣雨中望小孤山

七月初三夜

秋暑

發彭澤紀事和恆齋

遊下石鐘題山響樓壁

江聲閣次家聲山壁間舊韻

王令詒自吳淞至滄城連床話舊驚

聞錢越江學士京邸訃信悲感交集卽事成詩

宋中丞牧仲自江西移撫江蘇邀余入幕投詩辭之

同王令詒泛甘棠湖至城南謁陶白祠

送令詒歸青浦卽次留別原韻

敬業堂詩集卷十四目錄

德興堂續藏書十卷目錄

宋書

續藏書

宋書補遺

宋書補遺卷之四

宋中丞對竹自工西舒編取燕燕命人暴其特精之

開編錄工學士京秋信曾燕燕文集增補

宋書開穴宋繼山楚閣書

王今自具領注

續藏書

宋平石續錄山書對

宋書

宋書

敬業堂詩集卷十四

海寧 查慎行 悔餘

溢城集 起壬申正月盡七月

庚午春朱恆齋由刑部郎出守九江枉書見招踰年始往踐約既為輯廬

山志復遂廬山之游賢地主之祝我良厚矣

禾中與德尹別

四海皆兄弟何人似卯君也知年向老不合手頻分夜夢留殘月春帆感斷雲

得歸吾早決負土共成墳 時方計先人葬事

吳江留別張弘蘧庶常

南風激船如釋箭片帆曉發平湖縣百六十里半日程第四橋邊一相見開懷

各話別中事蒼狗浮雲凡幾變三年善病君差強君但憂貧不憂賤我今落魄

仍江湖明朝又欲西辭吳酌君之酒與君別楊花拂頭鬢雙雪

夾浦橋阻風

夾浦橋南客棹孤雨聲連夜洗平蕪東風吹淺吳江水半作春潮漲太湖

山塘晚霽

最好停橈近酒家放晴天氣日初斜盆梅謝後蘭芽茁正月蜂聲未鬧花

曉渡西沅回望宜興縣郭

櫓聲西入蝦籠嘴波面微微過沅風濃日吐煙煙吐樹浮圖一角是城東

蝦籠嘴西

沅港名

四飛管高淳前入沅水管出城半向未合手駛空交蕩留數日春時風濤雲

縣小無城郭橋長即水門魚蝦鯉作市鵝鴨鬧如村曲曲檣隨岸叢叢柳抱園

漸知江路近盈縮視潮痕

渡蕪湖關

兩槳前頭水勢寬曉風吹得敵裘寒漸空杼軸憐民困老閱波濤信路難此去

吾師聊作伴從來瀧吏必嘲官

時官妨為津吏所阻

篋中一卷彈箏集忍對江山制泪看

自此西上皆已未夏秋間與先兄韜荒同遊地也彈箏集兄紀游篇名

荻港人家杏花

輕舸細雨江村路過眼東風見杏花略似小車逢綺陌不知紅豔屬誰家

雨中過銅陵

沙尾沿流曲作堤青山一半吐城低洲空亂雁爭歸北路轉千帆盡向西正剪

渡時風乍漲最含煙處柳初齊客程已厭連朝雨不要春鳩更苦啼

雨後望九華山

橫看不與側看同九朵芙蓉並插空去鳥已衝殘雨沒歸雲忽漏夕陽紅劈開

華掌層層翠使盡湘帆面面風終是詩人言語大攜來直欲置壺中

東坡名仇池石爲壺

中九華

荷葉洲對雪

在大通對岸

梅根浦口風尤緊荷葉洲前雪正濃兩岸曉雲深似墨一條春水健如龍

唐羅隱會

卜居九華山下梅根浦按圖經江水歷李陽河經梅根口銅陵縣今大通有水自九華山麓出江即此也

雪晴池陽舟中

曉行池陽路霽景豁清美江南江北山照影同一水半銜殘雪白半插斷霞紫
眼前有奇句只在空濛裏我嬾吟未成風吹櫂歌起

大風至劉婆磯

江豚忽掉頭微動青玻璃俄看黑雲起遙指天南陲須臾墜我前橫截江兩涯
拔江噴作兩白日潛光輝初疑鰲山傾又若鱷窟移舉舟向空擲綆斷誰能縻
長年束手嘆有力不得施而我于中流高枕故咏詩明知怖無益聊復忍少時
男兒可憐蟲造物終見慈既濟乃思痛嗒焉中心脾投文訴江神略陳危苦辭
水從西南來風亦西南吹誰歟激使怒若是不可磯自我涉江湖十三年于茲
南浮及北渡履險間有之此胡太酷烈性命輕嶮巖仕宦涉江來揚帆若揚鬚
船尾點畫鼓船頭插黃旗大賈涉江來滿載居贏奇放溜如放馬控縱從人馳
我慙何所載載書載鴟夷壓浪一葉輕疾行固其宜如何強弓彎寸進恆苦遲
神于我乎薄厚彼寧獨私咄哉窮旅人初受俗眼嗤挪揄到五鬼漸漸伺路岐
惟神實正直倚賴相扶持今朝大戲劇漂泊將誰依禱罷似有感撫枕魂依稀

神來入我夢，責我大有虧。水渙成文，變化豈汝知。滔天初濫觴，至險出坦途。
汝以耳目料，何異握管窺。又好遠遊遠遊計，終癡萬里走從軍。還家仍布衣，
十年就場屋，逐衆趨京師。人曰：取魏科三黜名，獨遺謂宜自揣量。息影甘荆扉。
茲來非宦遊，又非競刀錐。皇皇義奚取放浪形骸爲。汝居頗有園，園中頗有池。
好風皺池面，浮花舞漣漪。此豈不驚波來，溷汝息機汝自捨之。出去安而卽危，
不聞南山隴下有季女，饑不見東洋畔中有踏浪兒。兩者聽自取決擇，休然疑
叩頭謝江神，痼疾神所治。大夢喚初見，行當早旋歸。

題樅陽旅壁

噩夢驚回路，已賒艸艸船上櫓。伊鴉青山繞屋無修竹，山皆頑石不產竹紅袖當壚有

杏花野渡漸生沿岸火，春流未沒去年沙。綠楊影裏初弦月，人隔烟江正望家。

田間先生聞余至自青山命駕來會喜賦

春風弭楫向樅陽，舊約多年不敢忘。先生在都下送余南歸詩有秋到皖江尋舊好可能一問白頭來之句四海

平交無行輩，兩朝軼事在文章。從知老境難爲客，誰與先生特置鄉。一片青山

高插漢巋然真似魯靈光

花朝晴示僧道楷

初日烘雲碎作霞討春人競出江涯老來不喜閒桃李別約山僧看菜花

自縱陽至楊樹灣道中即目

併日春光鬪物華馬頭胡蝶太天斜誰知駭綠紛紅候還有春風未放花

義津橋外

見碧桃一樹
猶未放花

三角潭

春禽交交鳴綠楊征夫辨色早束裝前行十里霧未醒驢尾秃速驢耳長朦朧
人語遙喚渡約略村落開微陽烟光兩岸溪一曲樹影四匝潭中央菜畦麥隴
桃李徑高間紅白低青黃新鵝野鴨好毛羽拍拍飛出沿方塘田家之樂樂何
限頓令過客忘他鄉只愁霧重天欲雨橫策又上黃茅岡

桐城謁左忠毅公祠

祠在縣治
東數十步

歷歷三朝事他時髮指冠賢人當橫決國勢必摧殘俎豆新楹肅乾坤正氣完

如何鄉後輩偏有孔都官

謂懷寧也

過田間先生山居相留信宿出示藏山集再賦二詩博和

層巒俯瞰萬松梢中有高人舊結茅自入鹿門詩一變竟馴龍性易初爻雲盤
遠勢鴉翻陣花作新泥燕補巢未免累翁雞黍約往還原不拒貧交
比似仙源那易尋避人畢竟要山深誰教鶴怨猿啼客來聽鸞歌鳳舞音語雜
談諧皆典故老傳著述豈初心好看龍馬精神健東武時爲抱膝吟

三江口苦雨

那刹磯頭雨殺風千檣烟氣濕濛濛楚天低壓平蕪外何處青山認皖公

大雪渡馬當

臥看穿雲日色黃起聞鯨吼北風狂新詩也得江神助雪打春帆渡馬當

順風揚帆時閉目靜聽如空山梵唄殊有會心

破浪風前萬鼓鳴喧囂原向靜中生無心只作深山聽一樹松濤起梵聲

與九江太守朱恆齋

一麾暫出領名邦九疊屏山九派江正喜為郎猶未老早聞治行已無雙謳歌

滿境鶉音革軒冕巡城虎氣降時有虎至郊外君移文城隍神一發磴之依舊官居精典籍只多鈴

卒晝敲梆

二虎歌并序

壬申正月有兩虎闌入九江西門外龍開河傷一人已而逸去市人惴惴恐

其復至朱恆齋太守齋戒為責躬文翌日大會屬員於城隍廟即漢將軍灌嬰及宋

大夫祠下漢九江守宋均既焚牒告神則命虞人挾弓矢火器窮追之期于必獲越

五日殪其一至是盡殲焉黃質黑章猙獰可怖聚而觀者數千人咸謂使君

至誠感神能力除民害也適余至九江目覩其事作歌以俟采風者

溢城連山猛獸多兩虎突入龍開河腥風悵悵日杲杲白晝市上無人過使君

視民如赤子威鳳生儀麟有趾豪強斂戢盜賊清爾獨何為至於此灌將軍廟

宋公祠能捍大患則祀之撞鐘伐鼓會僚佐第一先焚責已辭與神後先俱守

土政拙慚余不如古愛其父祖及子孫忍畀孱人飽虓虎明朝大獵城南闔毛

風血雨迷荆榛特開一面縱雉兔死不當罪傷吾仁須臾虎自林中出小者先
擒大者逸雖擒一虎戕一人其勢公然兩相敵此時伐罪更有名合圍再往大
掩羣潮州鱷魚必盡殺不信請讀昌黎文虞人眼疾如鷺鳥餘勇登崖鬪牙爪
咆哮一聲山忽裂火箭飛空碎其腦黑章黃質毛斑斑旗杠壓肩奏凱還猶防
作力斷急縛血色併出雙睛間道傍觀者爭太息自古神功扶正直百年兇暴
一朝除此事知公有陰德江邊戶戶皆椎牛從此山無樵采憂詩成大咲冠纓
絕我正欲作匡廬遊

廬山之遊未果呂灌園有詩索和

峨峨指雲峯拔地幾千丈仙靈晦高跡元氣棲蒼莽朝來雲抹腰露頂氣一爽
蓮花本無蒂蒸出仙人掌拂鏡眼雙明扶烟鳥孤往勿嗟遊未到遐矚寓心賞
但恐身入山依然結塵想

西門之役既連斃二虎矣後五日復獲虎子二呂灌園作後二虎歌再

次其韻

虞人入山官吏賀搆穴成擒無小大盡將醜類肆市朝不許兇雞草間臥去如
烈火歸如風覆巢破卵五日中獻肩獻縱來接武貫蝨精神用強弩擔頭縛作
春筍斑一一奇毛入官府餘威假託雖有徒不聞王政寬無辜賊吾民者殺無
赦別有淵藪容逃逋弱食頗分強者肉倚伏機難論禍福春行秋令公所憐陰
雨隨車洗餘毒是日大兩以寬濟猛在酌宜潁川有鳳方來儀殺胎豈惟禁獵戶竭
澤兼欲防漁師庶幾百物稱蕃息童子仁心使君德我為此語非養奸若是兇
豪須斂跡

揚花同恆齋賦

散作輕埃滾作團不成花片但漫漫春如短夢初離影人在東風正倚欄微雨
乍粘還有態柔條欲戀已無端祇應老眼憐輕薄長自摩挲霧裏看

初聞黃鸝次灌園韻

一聲流過小窻前去國關心又一年圓入客吟同宛轉熟聞鄉語倍纏絲畫樓
脈脈通春夢碧樹茸茸霽曉烟為是好音須愛惜自憐終勝受人憐

同呂灌園鄒仙來諸君遊甘棠湖登烟水亭次壁間舊韻

長烟濛濛春澹澹
草色波光晴颭灩
廬山翠掃兩角雲
倒瀉杯中青一片
舊開小閣壓紋縠
時見飛帆掣流電
背郭人如燕雀稀
點沙舟與鳧鷖亂
地偏絲管曲
嘈雜市遠塵囂風
截斷可憐俗眼競
喧湫誰肯清遊期
汗漫同時數子與
不淺佳句澄鮮分
謝練莫辭勝境日日往
預恐萍跡紛紛散
何當春酒變成湖
醉過鶯花三月半

東坡送劉景文詩云春酒一變甘棠湖自注云景文卜居九江近甘棠湖卽此地

琵琶亭次宋郭明復舊韻

春江帶城沙嘴白
弓勢彎環抱新月
我來縱棹半日遊
敗意眼前無一物
吟詩直入老僧家
小技忽癢難搔爬
分明有句和不得
古調豈叶箏琵琶
先生不作誰與語
白日茫茫變風雨
男兒失路雖可憐
何至紅顏相爾汝
與公相去又千年
依舊荒城無管絃
掃空題壁孤亭在
唉指門前浪拍天

江州雜咏四首

依舊江關俯麗譙
居人指點說天橋

明太祖破江州事

戰迴左蠡軍容壯
鑿斷殘岡霸

氣銷東門外有天子堂相傳劉誠意鎮將南朝偏跋扈部兵西楚最輕剽指左良玉

袁繼咸事自從血洗孤城後九派空回寂莫潮

天文容易掃欃槍鄰郡猶傳戍鼓鳴戊辰夏楚盜破武昌黃州鴉鵲自朝英布廟北門外九江王廟至

食魚龍曾擾灌嬰城紛紛設險寧論地往往時危獨被兵按史自北宋以來凡四屠城四

十三年休養力不知何福享承平

峭削峯巒北面當雲頭一半割南康高僧舊入遺民社世業誰留佚老堂三劫

烽烟埋洞壑百年文物遞滄桑名山志在真難續或有奇蹤墮渺茫時余方輯廬山志

別開官署射亭傍一角額城壓短牆螺髻浮青虛劍匣府署正對雙劍峯宋乾道中蜀人唐立方闢地

作三城壘樓其上謂之劍匣見程史雉媒平綠展球場紕稀小步初移市客上高樓必望鄉樂三天詩三

百年來庾樓上曾經多少望鄉人庾樓直府署北添得黃蘆侵岸闊舊遊回首獨神傷余己未壬戌兩經此郡

余作江州雜詩灌園既垂和續為潯陽行感慨淋漓讀之使我心惻因

推本其意再成長律四十韻首言風土次序東晉以後迨明初一一竊

據事終於寧南乙酉之禍此州被亂情形始末略備休養生聚其在斯

時乎並邀恆齋太守同賦

鼓角悲涼地山川要害城一州當孔道萬里控江程近楚風猶悍吞吳氣未平

鳧鷖飛易散魚鮪竄多驚戶少移恆業田礪廢力畊兒童知矢石婦女識旗旌

不諒流離苦翻疑性命輕舊文徵史冊殘局愴棋枰置郡名長易秦為九江郡漢屬吳國三

國初屬武昌後置潯陽郡晉改江州梁移九江治潯城唐封王面或黥謂英大

都當用武未有不稱兵建業朝廷小潯陽肘腋并中原方轉鬪南服暫維寧草

草圖王計寥寥伐叛聲奸雄雖反覆使相必忠貞間倚屏藩重頻扶鼎鼐傾晉

昌中陶侃領江州平王敦咸和中温嶠義兵由潯陽趨建業斬蘇峻隆安中劉毅何無忌輩敗桓玄于崢嶸洲梁承聖中陳霸先以江州刺史定侯景之亂

艱虞經剝運成敗付閒評是物關天授伊誰敢力爭每聞稱僭竊旋見就擒烹

宋泰始元徽中晉安王子勳桂陽王休範梁天監中刺史陳伯之俱以江州反未幾就平南宋建炎中李成陷江州為張峻岳飛所敗元至正二十年陳友諒

以江州為都國號漢改元大義尋戰死 昨者民何罪今來憤尙盈良以下專指左勤王須奉檄犯闕

爾無名灑上隨兒戲洄中咲客迎崇禎甲申良玉避流賊鋒欲遁九江遊擊胡

西春監軍御史黃澍偽藏太子詔召良玉入攻馬將軍停鎧仗辨士絕冠纓柳敬

士英良玉信之遂於三月二十七日移兵至九江敬業堂詩集 卷十四 七 中華書局聚

亭為良玉幕客 勿戢兵猶火搜牢地盡阬 初良玉發武昌挾楚督袁繼咸以往至是與繼咸標將郝二連營九江城

外四月初四日遂縱兵 摧殘鋒太酷屠戮禍交櫻漂血長溝赤燒空烈焰晴押

焚掠殺男女二十餘萬 綱連萬艦 宋曹翰屠江州取廬山東林鐵羅漢五百捲甲拔諸營作俑歸曹翰歸穎州調巨艦滿載金帛時號押綱羅漢

江州屠城自輸 貪狼甚李成 即宋建炎中反賊 天誅旋幸伏 兵發九江良玉以氣塞死舟中 殺氣驟難

清落籍銷灰劫招魂異死生若非敷大澤何以起疲氓牙孽枝初發勾尖草乍

萌及時資愛養太守賴廉明冷署依雙劍 峯 頽垣寄一楹涉園除瓦礫課僕種

蕪菁耗折空餅粟支吾折脚鐺官貧仍逆旅吏隱亦柴荆曉雨排衙坐春田露

冕行設施看次第氣象卜豐亨蟋蟀還農俗琵琶遣宦情篇成聊紀實大雅待

君賡

石鐘山

鄱陽吞天來噴薄南出口江流不能敵抵北乃東走懸崖峙西灣水勢掃如帚

孤城良其背外捍賴兩肘靈區聚神奸石狀雜妍醜平鋪理橫截旁罅中劈剖

熊羆饑攫人奇鬼起援手蜂窠掛篙眼烏卵破甕缶一一皆下垂中空無一有

有時應鞚輅照影見星斗忽然風喧厖聲作蒲牢吼年深追蠹壤兼恐石斷紐
惜哉坡公記石刻泐已久蘇公石鐘山記舊刻于南鐘石上明正統己巳石裂仆於水今失其處矣茫茫宇宙間孰
是真不朽

月夜自湖口泛舟還湓城同恆齋太守賦

空江夜東注月光似俱流舉頭看青天水去月自留移帆忽西向月又隨我舟
而月豈有心適與吾目謀澄觀得靜趣含景無停休不辭川路長獲此清夜遊
遠樹小池口孤鐘鎖江樓須臾燈燭光候騎迎沙頭誰知太守樂夢亦同鳧鷗

春晴曲效温飛卿體

朝陽透簷鵲聲喜烟外遊絲風綽起馬拂花鬢驕欲嘶招招酒旆垂楊裏蕉衫
筍屐稀出城上樓曉看南山晴平春遠綠望不到一幅錦機新織成江聲翦斷
尋芳徑九派澄光鑄明鏡柳花散作千點萍日夜東流知水性

三月十七夜與恆齋月下論詩

庾公樓外月飛光上雲崖此時兩相對此景良自佳我挾山野性尋君到衙齋

不棄貧賤交酬唱晨夕偕脫略分雖忘終不雜恢諧所商在文字虛受非擊排
縱論古與今瀉胸走江淮力欲追正始旁喧厭淫哇向來風騷流汎濫無津涯
可傳必有故長松出樊柴明明正變途花葉殊根荻須求作者意勿使本分乖
新詩壓時賢高朗洵少儕當與古爭勝拾級已得階人言簿書煩正坐乏雅懷
君懷皎如月塵霧其能埋

魚苗舩

幾片紅旗報販鮮魚苗百斛楚人舩憐他性命如針細也與官家辦稅錢

曉晴咏恆齋庭下芭蕉

放晴天色愛清朝閒赴風前翠袖招忽見主人窻下綠始知夜雨爲芭蕉

杜牧詩主

人窻外
有芭蕉

九江向無鱗魚網戶忽獲一尾以饋太守晚餐分噉作三絕句

鮑魚子鱗賤如毛何物能令市價高從此溢城添水產白頭春浪出銀刀

四月家鄉記飽餐朝來指動豈無端似防遠客歌彈缺破例相隨過鴨欄

鱗魚
不過

鴨欄驛以魚隨潮上
潮到小孤輒回也

三百錢償一尾鰓擊鮮原不累民間可知太守清如水豈在懸魚絕往還

暑庭蓄錦雞且一年朝來忽飛去恆齋有詩屬和

爲爾無端惜剪刀養成六翮竟如逃啄餘香稻新拋粒收得雕籠舊落毛羣入
家雞終不亂飛隨野鶴便能高人間是處多羅畢文繡深林好自韜

明日吏人以錦雞來視之卽昨逸去者再作一首

勿論城市異山林性在終知去意深誤啓樊籠驚遠舉特憐毛羽募生擒舊曾
相識緣文彩待爾重來伴苦吟從遣周防是誰過主人初不起猜心

初夏坐烟水亭望廬山二首

一奩明鏡插芙蓉積雨初晴翠靄濃萬疊好山看未足又添雲勢作奇峯

分明寫入畫圖工倒影看來上下同忽失水中山一半浪紋吹皺日高風

余方輯廬山志擬入山訪舊蹟頗爲雨阻恆齋有作和之

日日開軒對翠氛勝遊偏阻鹿麋羣不愁滄浦長多雨但恐匡山化作雲紀事

欲真須眼見異書難便信傳聞一條柳標從僧乞可要籃輿累使君

芭蕉恆齋再索和

一葉復一葉自然成綠陰後先如有序舒卷豈無心漸覺空庭窄能添曲徑深
野人新得句題罷亦長吟

夜夢入廬山桃花滿谷一僧指云此杏林也因誦樂天遊大林寺絕句

夢中了了醒而以詩紀之即用白韻

指點仙家手自栽桃花却傍杏林開眼前一咲真成幻公是身遊我夢來

午酒初醒

兀兀醺醺坐日斜爽神全賴闋林茶三竿砌竹搖風影一箭盆蘭得氣花夢枕
易消非實境丹爐難轉是年華江城節物關何事催得遊人獨憶家

生日書感

落拓差堪比牧之江湖曾費十年詩早衰鬢鬢非無故暗減心情只自知酒盞
每逃狂客座杖藜將赴老僧期尚慚習氣除難盡間與人爭劫後棋

梅雨二十二韻和灌園

五月潯陽雨蛟龍正鬱蟠地浮三楚闊雲納九江寬暴漲搖城郭餘波溢井幹
鄱湖連浩淼廬阜失巒岬鳴鶴翻依樹飛魚不上竿及時陰已動退位火疑殘
天氣昏連曉人情暖易寒蚊飛偏攪晝蛙鬧故侵官舊縷蛛穿網新泥蠟築壇
竹皮流薄粉桐乳墜輕丸蕉翠宜沈綠榴紅信渥丹濕螢光燄短掩鵲羽毛乾
柳壞蟻螬匿墻空蜥蜴鑽案蠅沿硯水穴鼠嚙盆蘭物理尋常見詩聯貼妥難
爐香縈几席黻黝上衣冠不出拋芒屨無聊却扇紈老嫌書幌暗病覺布衾單
冰簟涼貪睡琴絃緩廢彈入舟同寂寞着屐試蹒跚直欲登樓去還從倚檻看
空濛雖變態縹緲必奇觀

寓近在庾樓下
而不得登故云

雨中廬山僧書至

社裏何時著少文書來猶未斷聲聞千峯濕翠隨行脚帶雨開緘一屋雲
階除積水課力疏下流放之射圃隙地

尺寸階前地無源本易盈只應兼土濁那得入江清曲折隨人意高低驗物情

下流荒圃在吾枕厭蛙鳴

曉吟

江聲入戶竹風急樹影過牕山月斜誰共此時留此景殘更煞後未啼鴉

次灌園潯陽唱和賦感見贈二十四韻

大火方司令餘威未解嚴夕陽明杲杲殘雨過霏霏書少渾難借棋低又嬾拈
移時看燕乳隨意聽魚噲圍廢閱誰治江喧近可嫌談諧須得伴與會賴相兼
洗甕晨浮蟻推窻夜候蟾學禪根器鈍鬪韻筆鋒銛鄉信燈空卜歸期夢代占
山中俄換葛野服待分嫌我氣貧旋挫君懷老益謙悲歌翻變壯醉語誤疑譫
鴻爪泥長印蛛絲羽易黏勝遊宗炳畫往事季心鉗灌園爲吳江大司馬之子甲申以後因亂破家止
沸吹蠶冷焚枯過劫炎乾坤全晚節畊鑿合窮欄君有別業在玉屏山中爛熳三秋菊嶂
嶸百歲枿以閒聊送老所得詎爲廉幸舍猶彈鋏成都想下簾商聲流石齒仙
氣入霜髯高浪晴湖闊奇雲夏岫添掉頭隨去住放跡等飛潛澗壑終難返塵
埃久屬厭天涯同拙滯吟罷寸心惔

江漲八韻

頗怪連宵雨重雲，尙合圍忽聞溢浦水。已上庾樓磯，急鼓爭趨陣。高春怒發機，九龍多被譴。萬馬孰能鞮，魚健衝人過。鷗輕踏浪飛，淘沙原自濁。流惡想尤肥，幸勿侵三版。還防沒半扉，村橋新漲好。吾欲放船歸，余所居名橫漲橋

晚晴

曉愁暴漲與堤平，意外斜陽得晚晴。小閣放教雙燕出，高梧忽帶一蟬鳴。便思對酒難逃暑，若要看山合上城。狼籍殘雲飛不盡，江空留作斷霞明。

連日苦雨江勢轉盛聞小池口一帶已成巨浸感賦

見說黃梅縣連朝浸渺瀰，雨中隄盡壞江口地尤卑。農事侵饑溺天心望轉移，可憐關隴旱竭澤正斯時。

午後有人自廬山來云昨日白龍潭起蛟故水暴漲

瀑布聲中雨瀉檐，洪流百道走城南。山橋衝斷採樵路，歸報夜來龍洗潭。

廬山大雨

驟至人謂龍洗潭

曉霽望南昌歸信

十日荒城聽雨聲
壞墻前後露株楹
蛇因亂草當階臥
蝸是空坳積水生
喜動眉間看曉色
夢于枕上算離程
故應乾鵲知人意
已報歸期又報晴

桐陰和灌園

積雨晴來暑倍加
午陰端愛片時遮
展開疎簟三間屋
掃過空庭半月花
清露欲流濃作乳
碧天初洗澹無霞
如何葉底留蟬蛻
長聽高吟在別家

試弈次灌園韻

澹墨行疎紙
畫枰兩人隱
几亦忘情總
饒老手通盤算
只似兒曹鬪
草贏角上紛紛排
陣蟻睫前擾擾過
飛蟲莫嗤當局同
遊戲得失心空始不爭

夜熱不成寐聞秋蟲聲

循環造化機
陽壯陰已伏
不知昆蟲智
何以先草木
我亦化中人
投閒如病鹿
日長貪午枕
夜睡焉能熟
賴是心寡營
未妨羣動觸
徘徊風露下
大火西流速
須臾雞三號
細響猶斷續
誰能將此意
寫入玲瓏曲

樂天玲瓏曲云黃雞催曉
卯時鳴白日催年酉時沒

一草亭後補築土墻同灌園越秀賦

缺後方思補誰防未雨時大都勞版築不過當樊籬儉與茆亭配低於菜圃宜

墻頭環堦堦留看一帆移

墻北面環城堞

月夜得南昌消息知恆齋歸期猶未定

客來依地主主去客翻留萬事盡如此一官難自由日長愁過夏夜靜漸知秋
若上滕王閣休忘庾亮樓

蟬蛻和灌園韻

不應已蛻尚名蟬彈指難留過去緣枯比老僧初入定輕如羽客乍登仙誰云
解脫非生理始信飛鳴是後天從此蟾蜍無攫意機心不上七條絃

除草

病暍貪微涼空庭方夜坐蚊雷來茂草一唱千萬和誰能忍痒肌委身飼羣餓
可憐蜘蛛巧布網僅如磨暗飛餘地多舐觸凡幾個老夫為暫避奇計出高臥
除惡務其源攻先窟穴破披衣早我起刈草僕晨課一聞奏刀聲快若風雨過

非云迹盡掃但使勢少挫滋蔓或養奸斯言可喻大

灌園用瓷盆澆水浮以花片畜魚苗其中作案頭清玩索余賦之戲成

二絕句

詩翁六十如兒戲一勺分江几案間少片壺中九華石

湖口李正臣蓄異石名壺中九華東坡山谷皆

有配他剩水作殘山

魚吹花瓣亦生瀾水擊鵬飛一樣寬下得南華新注脚藕絲針孔是奇觀

露坐待月

城頭待月月未出一綫飛光曳長白明朝有客渡湖來湖面應添落星石

苦旱

積雨乃祈晴久晴迺望雨如何望雨意止在驅炎暑難將田野情一概例官府

江流空浩浩不救稔與黍南山昨日雲竚待商羊舞狂飈忽捲散吹井作乾土

朝來禱龍祠會衆伐大鼓此邦歲早穫隣郡給商賈六月合嘗新過時恐無補

可憐關中旱移粟累晉楚糧船從東來輓送方接武

時方輓運入楚漕艘

家家募丁壯日

日候江潯寧知魏運人自迫忍饑苦天心莽難測含痛向誰語

起最早

竹亭宜早起獨自繞廊行漸覺月光淡不知天色明草長兼露重庭曠得風輕
墻缺廬山好峯峯似染成

冒風渡湖口

湖欲與江合江猶吞吐間浪頭千點白一點是鞋山

立秋夜彭澤舟中

斗柄轉城頭江聲健入秋若逢明月夜應作小孤遊水柵依茆屋風帆帶荻洲
半年遷客夢星露警扁舟

雨後登彭澤北山佛閣

眼界江天闊登臨卽大觀雲根連地拔山勢讓城寬路險苔偏滑風涼汗易乾
夕陽紅欲墮好是獨凭欄

彭澤縣雨中望小孤山

龍城望小孤巖樹近可數何來雲一片遮斷蘆花渚遠勢入微茫彭郎磯外雨

龍城彭澤驛名

七月初三夜

七月初三月如弓未上弦涼風彭澤柳遠火望江船不作披衣坐聊爲枕枕眠

傍人多笑我辜負早秋天時余微疾早臥

秋暑

大火初流暑未清長川落日正西傾氣蒸遠水浮天動血染殘霞照夜明蟋蟀豈知催雨意蒹葭只慣報風聲故鄉消息經時斷白髮無端一夕生

發彭澤紀事和恆齋

吳楚西來太驛騷亂帆御尾上千艘戍旗不動方傳箭秋水初平尙滿槽樂天詩江

鋪滿槽水樹豁忽疑遙岸盡天長不覺遠山高民間疾苦原難悉移粟徒煩 睿慮

勞

遊下石鐘題山響樓壁

牛羊滿山似可驅鞭之不動非石乎懸崖無根乃有株老榦亂拔千章榆嵌空樓閣凌紫虛列仙遠邀山澤臞落星如漚漂大孤五老拱揖朝香爐沙洲鎖斷九江脈正面全受鄱陽湖湖波本清如碧矚下流盡被江所污是日大風聲拔木洪濤倒挾雷霆趨須臾風止平若鋪細聽林籟鳴笙竽石鐘非鐘扣亦愚孰辨清越分涵胡作詩一咲解者無四壁自看江山圖

江聲閣次家聲山壁間舊韻

勿將架構擬人工百尺高樓萬里風彭蠡遠帆斜出口匡廬晴翠淡粘空涼生欄檻秋先爽助得江山句轉雄好是不題名姓在免教僧費碧紗籠

王令詒自吳淞至溢城連牀話舊驚聞錢越江學士京邸訃信悲感交

集卽事成詩

急雨渡江來蕭然挾秋氣清風偕好友一夕千里至殘燈照黃昏梧葉響階砌荒城忽連榻此會出不意可憐窮旅人一咲天併忘新歡猶未極旋隕傷心淚憶昨客京華青衫最憔悴髯公獨好我不與時並棄往往合酒徒開懷使沈醉

江湖莽回首已若隔生事那復承訃音嗚呼別離地君頭絲欲換余齒豁已墜
浮生知幾何聚散逆難計吟蛩耿敗壁達旦兩無寐

宋中丞牧仲自江西移撫江蘇邀余入幕投詩辭之

此遊本意因廬嶽半載逡巡未謁公擬束歸裝向溢口送移旌節赴江東空煩
使命雲霄上豈有人才道路中敢謂山林便野性倦飛無分借秋風

同王令詒泛甘棠湖至城南謁陶白祠

艇子打兩槳剪風如燕梢白鷺導我前行行入蘆葦古祠晝常啓不待遊人敲

門前十畝田按碑記云有田十畝即以給居僧夏旱土不膠牛宮柱欹側旁種苦葉匏居僧老

業農叱犢犁黃茅苦云生理拙歲歲山田墮入門風氣道沙水互裹包湖光隱

林杪山色遮城坳天然好位置結構宜槽櫟緬懷二先生潛見各一爻潔身苟

有歸千載應神交如何斗室中湫隘隣福庖誰能移佛座勿令名實淆正室三間中設

大士像而二公祠反在其左與僧廚偏處殊不稱也

送令詒歸青浦卽次留別原韻

遠別無善地况乃當溢城送客不思鄉此語非人情鄉心我久發非緣送君生
輸君後我來竟復先我行大江秋滾滾日氣昏離程斷雁思舊侶閒鷗狎新盟
茫茫對岐路歸計何時成

敬業堂詩集卷十四

敬業堂詩集卷十五目錄

雲霧窟集

遊廬山道中寄恆齋太守

經周濂溪先生廢祠

太平宮

東林寺

題遠公影堂後冰壺泉

宗雷禪師索贈

題東林方丈

三咲堂書阮亭先生題壁後先生題

志云乙丑新正四日同里阮亭王某奉

命祭告南海過東林三咲堂

觀故友東癡先生題詩爲之憮然詩載南海集中

西林寺贈魯宗上人

遺愛寺小憩

香爐峯尋香山草堂故址

上化城

由關門石步行十里登大林峯

講經臺次昌黎遊青龍寺韻

推車嶺

大林寺問上人茅齋

洪武御碑歌

循佛手崖觀竹林寺石刻至訪仙亭

天池寺

聖燈巖

趙忠定公廢祠在天池塔傍

赧封寺瞻赤脚塔

下擲筆峯渡將軍河抵黃龍寺觀明慈聖太后所賜紫衣經幢及元人十

八羅漢畫像

金竹坪

太乙峯西麓有蘆林亦靜者之居也

自含鄱嶺下東行至蚱蜢嶺望大小漢陽諸峯

入九疊谷循觀山麻姑崖經屏風疊上一綫天會日暮不及觀三疊泉而

返

晚至萬松坪二首

五老峯觀海綿歌

青蓮谷青蓮寺

徧遊鈴岡嶺下諸禪室

早發萬松坪

峇口下山

從萬壽寺經百花園

淨成精舍懷天然澹歸二禪師時二公俱下世矣

三峽橋

棲賢寺阻雨示角子禪師

雨後再至玉淵潭觀水勢

白鶴觀舊有唐道士劉混成手植杉

東坡先生嘗獨遊聞碁聲於古松流水間卽其處也

白鹿洞書院紀事四首

鹿眠場

左翼山武侯祠

循貫道溪南北觀朱文公題志諸石

刻

次韻荅白鹿洞生周辰臣並簡學博

鄭子充副講徐履青

出白鹿洞經羅漢嶺下至王楊坂

萬杉寺贈熙怡長老

開先寺

李中主讀書臺

王文成紀功碑

題聰明泉傍石上

玉峽亭觀瀑

萬竹亭

五乳峯下望黃巖瀑布

歸宗寺次賴濱先生舊韻

登右軍閣

鸞溪

寄題簡寂觀十四松

從栗里渡柴桑橋至鹿子坂訪醉石觀靖節祠

圓通寺與杲菴夜話

月下步入隣菴同杲公

尋夜話亭一翁二季亭故址皆不得戲示杲公

渡石澗橋欲遊石門精舍不果 廬山雜詠四首

遊山歸錢越秀呂灌園出示見送詩戲荅二首

自題廬山紀遊集後

敬業堂詩集卷十五目錄

出山後歸隱廬山詩不至王詩

大願若白雲爾之風氣田並爾學

前賢數點南北購米文公願志

白雲山房詩

白雲山房詩四首

敬業堂詩集卷十五

海寧 查慎行 悔餘

雲霧窟集 壬申八月

二月杪抵九江卽擬作匡廬之遊因循至秋仲恆齋爲余聚半月糧遂策杖往自化城北登山南下舍鄱口循麓而歸凡十餘日得詩七十首身在雲霧中仍恐未識廬山真面目也

遊廬山道中寄恆齋太守

山行宜寂寞獨往翻踟躕一遇同遊人

謂王琴村

決起興有餘頗累賢地主聚糧辦

籃輿曉來風色好初日明煙墟千巖排空來勢若掖以趨但聞空翠裏竹樹聲疎疎我今心力衰事事不迨初預愁無傑句何以酌匡廬

經周濂溪先生廢祠

尼山大聖人重去父母邦人情非得已孰肯違故常先生少而孤依舅居丹陽母歿卽葬此後乃官南康官貧久不歸遷柩於九江仁心重廬墓卜築匡山傍

托名寓濂溪中豈忘故鄉同時往還輩無若蘇與黃猶不諒此意作詩徒誇揚
我來千載後拜公謁祠堂荒畦被秋禾四野煙茫茫溢城賢太守為政持大綱
度地面三峯種蓮池中央煌煌謚告石舉廢今方將時恆齋捐俸重創書院
願備洒掃人
幸勿揮門牆

太平宮

北風江上來吹瓦墮屋角牛羊入廢觀古木一鳥啄問此宅何神其來已渺邈
肇興自唐代廟貌遞樸斲唐開元中封廬山神為採訪使者上古神靈封每視三公爵東南
北中嵩岱恆華霍廬山雖僻左不得列五岳傲然踞江湖氣象頗卓犖無端加
秩祀屈首受正朔山靈恐未甘孰與一丘樂黃冠那解此意在崇榱桷昏昏入
醉夢舉世呼不覺神來風綽旛神去雲解駁下視九萬空紛紛蝸與鷺

東林寺

連山袞袞來陡起山門前頑空被偪塞失却東南天石稜瘦筋露礪道枯綆懸
不知何峯水流作溪橋泉入門尋斷碑古蹟想白蓮同時十八人縛律如坐禪

飲酒不入社淵明豈非仙

題遠公影堂後冰壺泉

影落空堂不記年依然冰雪照蒼顏定嫌人世江湖濁莫放清流更出山

宗雷禪師索贈

荔枝塔古名僧少誰是堂中十九賢好乞謝公池畔水為師重長一枝蓮

題東林方丈

浮嵐疊翠偪崔嵬三面周遮一面開我欲向西添小閣盡邀九十九峯來

株嶺一帶

在寺西若置一閣名九十九峯亦絕勝也

三咲堂書阮亭先生題壁後先生題志云乙丑新正四日同里阮亭王

某奉命祭告南海過東林三咲堂觀故友東癡先生題詩為之憮然

詩載南海集中

聽雨軒中昨曾宿虎溪橋東今又過謝靈運屐去已久蘇子瞻詩留不多兩袖

攙雲獨惆悵一燈照壁猶吟哦沙彌竊聽傳怪事大咲此客如風魔

西林寺贈魯宗上人

夕陽在西林孤塔支青天中有六朝寺鬪古不鬪妍樹頭一朵雲渡水俄爲煙
老僧送客罷倚樹聽涼蟬

遺愛寺小憩

侍御遺蹤已久蕪盤盤樵路極縈紆萬竿藏塢初迷寺一笕分泉直到廚勝地
乍來忘過客衰年漸欲信浮屠木樨香裏逢僧話舊事三生記得無

香爐峯下尋香山草堂故址

古寺折而南一峯轟香爐北有草堂址荒榛穴鼯鼯白公真天人咲傲凌中區
本挾煙霞性歷遊仕宦塗當其卜築時意已忘羈孤人生營菟裘寧必皆故廬
等是有興廢此中別賢愚

上化城

懸崖多烈風石縫樹不長怪此獨雄拔枝枝蔽穹蒼路轉倍蕭森古陰暗虛廊
鳥巢不敢寄一一皆下翔我亦難久留毛孔森開張翻思風雨會快受六月涼

由關門石步行十里登大林峯

此來爲遊遨忽迫失足慮中情一恇怯進退兩失據墮雲如奔逃片片掠面去
霞標尙天半欲到苦難遽松根絡崩巖怒石虎蹲踞隨身賴竹杖將伯倘予助
移時陟層顛鸞鶴似可御眼前少行輩坐長丈人倨登頓方自茲休矜最高處
講經臺次昌黎遊青龍寺韻

城中望山如握管寸碧抽簪目光短罡風掣我絕頂來地少雲多鋪滿滿一條
江水拖細綫四面天形罩圓傘鶴經枯樹成墮翎龍去空潭不貽卵何人結茆
荒山顛米罄齋廚爨長斷豈惟米罄水亦竭兼值今年連月旱秋陽炙背汗透
衣客到苦催供茗盃老禪對客大嗚噓指說茲遊太荒誕休誇筋力尙有餘應
慮頽年行莫纂

陸機賦傷頽年之莫纂

偶然饑渴所不免前路茫茫預難算資生破寺例

乞食此去深山漸無伴雨襟風帽好自擔垢脚鰲顏向誰澣奔馳不定覺客忙
應接無端累我懶白頭住山年六十投老安心就閒散芒鞋不踏戶外塵坐看
嶽崎化平坦遠公歿後經臺廢世外名僧近尤罕談天高論久寥寥一聽清言

真款款此來得此吾有幸大似冬寒變暄暖好奇歷險亦何為語不在多微中
窳浮情一半為芟除相別出門行步緩

推車嶺

奮身出絕險深入得平地玩情忘安危履險識難易憑高試北望來路直如棄
枯株盡僵仆樵採遠莫致野火歲燒林虎狼何處避前山有厲禁僧律嚴於帥
漸入翠微天濛濛雜煙氣自此至天池皆禁山矣

大林寺岡上人茅齋

盤煙下層霄山骨微負土陰日光澹漠漠風氣古寶樹壓橋低一溪環菜圃
香山舊吟地花徑兼宿莽白樂天曾於此四月看桃花其地猶名花徑廢寺亦荒涼半間用茅補孤
清耐久坐客至何必主林靜無匿聲虛簷應樵斧

洪武御碑歌

昇仙臺前白玉碑柱石擎攫龍之而鴻文載在御製集初不假手詞臣為我來
摩娑一再讀顛者蹤跡大可疑憶昔元人失其鹿羣雄角逐爭驅馳濠州布衣

人未識芒碭雲氣常隨之金陵一朝定九鼎六合不足煩鞭笞是時楚兵最剽
悍不自量力來交綏國家將興有先兆天遣來告貞元期明明天眼識王氣故
以險怪驚愚蚩英君往往謀略祕計大不許尋常窺亦如田單破燕騎神道設
教尊軍師不然茲事乃近誕小數何足誇權奇白旄一麾江漢靖軍前長揖從
此辭留侯自伴赤松去穀城空立黃石祠天池之山高巍巍竹林仙馭杳莫追
鶴歸倘記石華表世代已逐滄桑移百年雨露在山澤惟有松柏參天枝

循佛手崖觀竹林寺石刻至訪仙亭

何年鑿渾沌洞戶啓虛牝瞰空飛瓏玲萬古凝不隕泉蒸濕氣成一一結芝菌
其西勢陡絕難以尋丈準天窄忽倒垂地豁平野盡寸人不點目寸樹如束筍
遠視入毫芒俯身迫窮窘傍崖嵌樓閣側背削蒼隼青鸞十萬隻掉尾掃欄楯
竹林疑有無仙者蹟久泯短生寄長世局躋良足憫如何不自廣蟠螭同蠖蚓
御風倘可行吾意欲遠引

天池寺

西跨馬鞍脊東拊五老背廣袤四十里南北兩交會地界畫雲霞岡形走杉檜
架空營紺宇巨麗一山最佛皆鑄金為殿用鐵瓦蓋象筵及法供半出尚方賚
琉璃百盞燈光燭楚天外鳴鐘集萬指部牒領司會音膾當時曠蕩恩池水亦霽
霈神仙事渺茫崇飾毋已太爾來漸凋耗隙影過塊塏殘僧四五人被衲嬾結
帶天池旱亦涸磴道入蔚蒼獨客來登臨嗒焉發深慨窮陰蓄邃谷瑟瑟響秋
籟

聖燈巖

見說文殊谷神燈照夜明山僧從未見高臥過三更

趙忠定公廢祠在天池塔傍

丞相塔前

塔為韓侂胄所建故俗呼丞相塔

丞相祠千秋興廢偏同時我來弔古一惆悵青史

賢奸僧不知

赧封寺瞻赤脚塔

自從蛟拔門前樹水氣猶腥一派泉萬瓦盡隨飛雨去孤鐘空向廢堂懸

三年前寺

傍起蛟以百數殿瓦悉爲所掣惟存屋柱而已泥金塔縫風吹裂映竹窗櫺日射穿不用琳宮更魏煥

御碑原自配羣仙赤脚僧天池四仙之一也

下擲筆峯渡將軍河抵黃龍寺觀明慈聖太后所賜紫衣經幢及元人

十八羅漢畫像

危峯拔奇峭插漢秋崢嶸下走數千尺此身疑被阮溪流寬且長潭影黝而清
飛泉濺我領過山猶水聲漸入漸無蹊蒼松與雲平萬枝皆直上曲木何由萌
入林見精藍御扁題有明勅建自神母豁達開朱甍一道護藏碑蛟龍拱函經
架袋垂頰婆錦繡揚旛旌新如手未觸機上初織成元人留畫圖用意填丹青
年深彩色退神氣逾發生劫火焚天池赧封亦頽傾黃龍獨無恙故物猶充盈
得非深山中呵禁趨百靈勿輕現光怪恐使神鬼驚

金竹坪

水緩山舒一徑分叢篁戛翠晚氤氳秋陰非雨亦非霧嵐氣似煙還似雲偃蓋

松低從蘚蝕藏經函古費香熏內官死後茅菴廢好事僧稀失舊聞明萬曆中有太監劉

姓結茅於此
今菴廢址存

太乙峯西麓有蘆林亦靜者之居也

誰將半幅江湖景移置千峯最上頭撥觸遊人動歸興蘆花風裏屋如舟

自含鄱嶺下東行至蚱蜢嶺望大小漢陽諸峯

已近匡南道紆迴下嶺行路尋松鼠跡山占草蟲名曉露沾衣重秋風信杖輕

翠屏圍合處遙指仰天坪

在漢陽峯上
廬山最高處

入九疊谷循觀山麻姑崖經屏風疊上一綫天會日暮不及觀三疊泉

而返

信書不如無身歷解其故好奇輕坦道冒險犯迷路廬山載圖經絕勝因瀑布

三疊尤稱雄此來期勇赴尋源既已得一壑經屢渡波濤所衝撞石滑不留步

荒榛或刺眼蛇蝮時挂樹雲屏橫我前陰瀨風逾怒偕行率興盡深入獨無怖

漸上一綫天團團失四顧日光所不到勃窣但煙霧徘徊問樵夫道遠日已暮

逡巡半塗廢老懶坐自誤快事豈可常一悔生百悟

晚至萬松坪二首

論谷量松不計株參天一片翠模糊明朝五老峯頭望又作蒼雲貼地鋪

此中舊有高人住

謂聞極上人

遲我來尋五六年畢竟著書須擇地人間難得好林

泉

五老峯觀海綿歌

峭帆昔上鄱陽船我與五老曾周旋兩塵相隔骨不仙蹉跎負約十四年近來
稍知厭世纏筋力大不如從前扶行須杖坐要篋絕境敢與人爭先山神手握
造化權走入南極分炎躔鞭羊欲從後者鞭假以半日登高緣風清氣爽秋景
妍芙蓉千丈開娟娟長江帶沙黃可憐湖光淨洗顏色鮮背負碧落蓋地圓尺
吳寸楚飛鳥邊初看白縷生棲賢樹杪薄胷兜羅絲移時騰湧覆八埏四傍六
幕一氣連滔滔滾滾浩浩然渾沌何處分坤乾近身扁石履一拳性命危寄不
測淵陽烏抵撲光倏穿饑蛟倒吸無留涎以山還山川自川五老依舊排蒼巔
來如幅巾裹華顛去如解衣袒兩肩酒星明明飛上天人間那得留青蓮此時

此景幻莫傳頃刻變滅隨雲煙

青蓮谷青蓮寺

饑鷹入山猛如虎掠過松梢攫飛鼠林深谷暗人更稀橋斷溪橫道多阻忽逢
大石刻三字快若同遊獲徒侶前行依舊路茫茫太白書堂在何許三間破屋
佛委地一帶頽垣草沒礎獨來高詠廬山謠白日軒軒欲輕舉屏風疊與五老
對想像先生舊遊所石梁卽是三疊泉此景分明在詩語後來著書好穿鑿衆
論紛爭吾不與太白廬山謠有屏風九疊雲錦張銀河倒掛三石梁之句元李
洞言三石梁在開先寺西黎嶺言在五老峯上或云在簡寂觀
及上霄紫霄二峯間桑喬廬山紀事則竟以爲無如竹林寺之幻境衆說紛然
莫知所指今三疊泉在九疊屏之左水勢三折而下如銀河之掛石梁與太白
詩句正相脗合非此外別有三石梁也後人必欲求其地以實之失之鑿矣
古仙不作誰正之悵望秋雲久延竚

徧遊鈐岡嶺下諸禪室

山僧住山久不道深山好山下每相逢山中跡如掃禪居旣寂寂過客亦草草
林荒鳥語斷葉落寒氣早物外識閒情誰能耐枯槁

早發萬坪松

昨登五老峯足力鬪輕矯投茆舍宿睡美不知曉豈惟廢鐘魚林寂少棲鳥
起來見晨旭殘月猶雲表山谷催早涼陰多晴恐少迨茲好天氣我興殊未了
峒口下山
匡南古道誰開闢懸溜垂絲通一脈劣容半足百八盤直注雙眸五千尺靈區
再上苦不易步步別山多可惜舉頭却望昨所經似到蓬萊今被謫

從萬壽寺經百花園

草煙竹靄午霏霏行盡懸崖接翠微過夏客餐嘗筍去隔林僧擔賣茶歸穠花
繞砌晴添豔乳水流田土漸肥自覺向南風候暖早秋時節尚生衣
淨成精舍懷天然澹歸二禪師時二公俱下世矣

萬枝修竹一龕燈山外青山又幾層有此林巒應著我無多文物半依僧香前
蠹辟繙經案鉢底龍眠挂壁藤紫桂巖前人不見秋風猶記別南能

往與澹公別於家黃

明伯如
圖中

三峽橋

陟山須到顛尋水須到源我從泉源來送汝歸山根上流九十九併力同作喧
前行經玉淵盡爲潭所吞既吞不勝受含雪空中歎急峽跨飛橋約束遏其奔
一條天矯龍中有跌斷痕挾此萬古怒轟轟爭一門遊人不敢立足底防瀾翻
松風吹細雨到寺將黃昏

棲賢寺阻雨示角子禪師

七尖峯埋煙一塢五老神情皆下俯攜來杖頂昨日雲洒作燈前夜來雨石頭
路滑不可行遊人早起祈天晴禪翁勸我且喫飯同向空堂坐水聲

雨後再至玉淵潭觀水勢

着屐重來又一奇飛流十丈躍龍池不知雨點添多少跳沫粗於白鷺鷥

白鶴觀舊有唐道士劉混成手植杉東坡先生嘗獨遊聞基聲於古松
流水間卽其處也

古觀荒荒冷翠交一渠新漲浸堂坳雨眠亂草移蟲窟風折枯枝帶鶴巢
不飄經院靜棋聲久散石牀拋三山路僻人稀到頭白黃冠自結茆

白鹿洞書院紀事四首

古洞盤旋路欲封，到門無樹不喬松。陰森前後三重殿，突兀西南五老峯。兵火

縱教仇典籍，蟲魚何敢蝕蛟龍。

書院中有二十一史及御賜十三經

額 睢陽岳麓全荒棄，留

得宮牆儼辟雍。

書院舊名廬山國子監

九原可作心相許，千古淵源只數公。大事商量何草草，當時位置太匆匆。祠荒

勿復論分合，道在終須辨異同。祀典也應煩早定，莫令禮樂咲淹中。

前賢餘澤最分明，立法雖良視奉行。幸爾流風綿歷代，猶從朔望集諸生。學田

籍去官支俸，觀德亭荒土好名。此日終南非捷徑，溪山何負讀書聲。

松顛紅鶴早歸來，卓爾山前半草萊。題扁已更新歲月，看碑猶辨舊亭臺。無端

講院人人設，何怪儒風日日頽。傳語後來須慎重，此間容易着英才。

萬曆己卯張江陵禁

革書院先是常有紅鶴百十巢於後山松杪其年忽去越三年仍來巢書院隨議復

鹿眠場

山人陳迹久荒唐，石洞新移近講堂。町疇年年秋草沒，兒童偏指鹿眠場。

白鹿石洞

明南康守王濬壘石爲之
在彝倫堂後非故處也

左翼山武侯祠

舊來忠節祠何處丞相新堂獨改營

洞中舊有忠節祠合祀武侯靖節今若是祠廢靖節神位移入朱子門人之列

此中多序爵故應無地置淵明

循貫道溪南北觀朱文公題志諸石刻

我留鹿洞訪古蹟夜以繼日勤搜羅穹碑無數作林立大半劊刻時人多蛇蟠
蚓結互相雜頭目眩瞽猶摩挲先生姓字如日月照耀宇宙開山河生平衣履
皆可敬矧乃手澤存巖阿溪邊巨石見題字小者徑尺大擘窠自然運用合古
法小技不算隸與科水淘土蠲殺節角元氣尙自盤蛟鼉誰能撫取置殿壁細
辨點畫無差訛嗚呼所見毋乃小金石非壽道不磨

次韻蒼白鹿洞生周辰臣並簡學博鄭子充副講徐履青

吾生苦失學悔往思補來一經未精通賦命多遭迴靦顏扣名區洞戶呀然開
登堂挾浮氣靜者恐見猜此來爲求友庶幾遇奇才之子杜門處堦前長蒼苔

昔年充國賓羣彥多追陪脫身出京洛振步凌崔嵬爲儒務其醇好勇知所裁
士方處貧賤有識羞良媒詞章技尤卑小草殊根芟讀書不聞道枯朽安足摧
古來名師儒所以重草萊

出白鹿洞經羅漢嶺下至王楊坂

蒼蒼轉一溪窅窅凡幾曲烟中見村落雞犬傍草屋阡陌交橫從秔稻爾早熟
謂言岡路盡豁眼得平陸涉澗水急流吾行尙山麓循流溯此水來自棲賢谷
想當暴漲時發石拔老木兩傍設機碓日可轉百斛此法俗不傳勞勞手春粟
萬杉寺贈熙怡長老

慶雲峯麓萬杉寺拓地舊傳天聖中大書鑿石剩九字

寺中石刻甚多悉爲僧所踣蹙今惟槐京包帚

書龍虎嵐慶九字在寺後石上古殿跨山連百弓夕陽沈沈南去鳥秋氣颯颯西來風相逢不

談戶外事吾愛老僧雙耳聾

開先寺

平橋曲磻氣森森門鎖空堂晝轉深

時居僧以斫伐佛印手植松爲當事所逐三門晝閉小吏司鎖鑰鴨脚葉

黃僧罷掃麝囊花紫客來尋

寺創於南唐時山中有麝囊花色正紫蓬萊諸峯瀉瀑層

層見萬木聞蟬步步陰可惜不容吾借榻山南第一好禪林

李中主讀書臺

鶴鳴峯勢倚巒岫指點南唐舊石壇畫像影中松葉換

黃山谷開先禪院記有南唐中主畫像及榻存

焉 墨池涸後蘚花乾累朝題志名空在衆口傳訛辨最難俗傳昭明太子書堂者訛珍重涪

翁留片碣雨淋日炙恐摧殘石上刻山谷所書七佛偈

王文成紀功碑

明朝制科號得士吾鄉前輩尤絕倫于公王公後先出往往艱大投其身朝廷坐收養士報倉卒定變皆儒臣正德己卯夏六月逆濠犯順江湖濱公然舉兵思向闕三郡一闕生妖塵皖口駸駸勢將下留都岌岌恐震隣是時海守正清晏武備缺略久不振公方持節撫南贛似可觀變徐遭迍同仇大義憤所切守土敢限越與秦出師必待九重詔是謂以賊遺君親飛書插羽聲罪討攻所不備真如神自從擣巢及執醜通計時日纔兼旬軍門戎首已面縛天子韎韜方

南巡石頭城南獻馘罷待命行及明年春周公東征尙跋蹙形跡詎可拘忠純
盈庭宵小古亦有忘者愈衆節愈伸初心祇期濟國事豈必畫像圖麒麟茲山
勒銘蓋有故深刻歲月題庚辰紀功非夸乃紀實書法遒勁辭溫醇首從伐叛
敘始末繼舉神武歸丹宸天方嘉靖我邦國誰其紀者臣守仁隨征官屬例得
列惜哉名姓今俱湮讀書臺傍一片石百四十字磨崖新逸事吾聞長老說弘
治乙榜凡三人後來立朝適共事數本前定非無因胡發其奸孫殉難公乃一
手回千鈞弘治五年吾浙鄉榜公與胡公世寧孫公燧同舉其年場中見三巨
人傳爲異事及宸濠之變胡首發其奸孫以巡撫死難三人共此事
奇也煌煌勳業本德性出遇世會開經綸質諸百世可無惑似此理學寧非真
後來輕薄好詆毀撼樹不過欺愚民如公表見猶未免此外何以加冠巾手磨
碑碣發長嘯白日皎皎懸秋旻

題聰明泉傍石上

頑童漱清甘我見謂可惜我旋被彼咲浣手向澄碧人苦不自量無端分別多
飲牛與洗耳相去能幾何

玉峽亭觀瀑

女媧煉石手年久漏微罅銀河忽垂天峯頂劈二華陰寒透毛髮觀者初可怕
從來所踞高一跌必就下龍歸爭窟宅思以一戰霸雷霆震嚴冬冰雹凜炎夏
衝成井萬丈避去石三舍束身峭壁傍俯視若出跨相持勢難合掉尾竟傾瀉
來者競喧囂逝者已代謝風林延靜聽漸遠似分汨縲縲絲車鳴泱泱糟床醉
盡平震蕩心坐以觀物化

萬竹亭

孤亭避玉峽一徑幽篁裏鑿斷籜龍根石槽方吐水

五乳峯下望黃巖瀑布

五峯融乳氣流濕一穴洩雲聲滿空落日正懸高樹杪行人却在雨絲中

歸宗寺次頽濱先生舊韻

遙瞻孤塔近聞鐘又到金輪第一峯五老烟霞猶在眼六朝風景獨留松

寺爲
王右

軍捨

宅 鵝池細合簾泉派鸞水涼分茗盃供歷徧名藍茲最古夕陽簾閣影重重

登右軍閣

右軍高閣俯碧渠古木漾影交扶疎迴廊灣環得幽趣高有飛鳥潛有魚此間
臨池頗自可我腕有鬼不善書作詩亦欲題壁去擲筆一笑成墨豬

鸞溪

二老風流路未迷青松名與白蓮齊若將山水平情較似覺鸞溪勝虎溪
元豐中周

灑溪先生與真淨文禪師於此
結青松社人以此比虎溪云

寄題簡寂觀十四松

梁時碑記梁沈璇有簡寂觀記晉時松十四株如十四龍約汝重來吾不負好留鱗甲待

吟筇

從栗里渡柴桑橋至鹿子坂訪醉石觀靖節祠

陶公家柴桑地本接栗里高賢棲隱處土物覺清美風翻紫芋苗雨綻紅蓮米
平坡樹簇簇枉渚波瀾瀾徘徊山東南何處訪故址逢人輒問姓覬遇陶氏子
但見牛角翁叱牛入烟裏先生在當日逃祿如脫屣至今山下柳尚識折腰恥

肯令後世名人人得輕指聞風感頑懦卽此可以起

圓通方丈與杲菴長老夜話

到門山壓樹冒石水衝橋古殿防頽塌閒房取寂寥齋鐘秋後準燈盞夜深挑
尋遍峯峯寺高僧不在遙

月下步入隣菴同杲公

尋山翻苦忙忽忽度長日徘徊撫良夜清景殊未畢隣僧閉門早避月不肯出
客來扣柴門帶月入爾室空堂琉璃暗古佛黑如漆不有好事人清光爲誰溢
尋夜話亭一翁二季亭故址皆不得戲示杲公

十里無端枉道來歐蘇陳蹟委蒿萊人間好事誰如我博得圓通一宿迴

渡石澗橋欲遊石門精舍不果

客從山中來嵐氣濕巾帽北尋黃龍潭南送白水漕

五老峯下澗名讀作去聲

石門路非遠

一澗流浩浩翻以耳目前行蹤未經蹈吾將賈餘勇直入窮閭奧謀及道旁人
競以險惡告或云林黯黹或云石鴛鴦或云夔罔兩遇者恣凌暴或云採樵叟

壯年曾一到白頭每追悔相戒勿再造或云天池僧亦曾宅崖隩荒寒難久住
苦舍隨欹倒爾來更誰繼奇險敢輕冒老夫爲踟躕獨聽奪羣譟迴思謝康樂
鑿山每開道當時築精舍物力豈空耗不得從之遊悵然違夙好

廬山雜詠四首

食豆兼食苗豆苗瘦如縷不聞豆花香惟帶豆葉苦

豆葉菜

老鴉銜茶子墮石久成樹何必百花園峯峯有雲霧

閩林茶亦名雲霧茶

誰遣冒松名而長三寸許山頭有蓬藿俯視猶傲汝

萬年松

山花合在山幽谷尋難見却笑紫蓬萊愛入移風殿

麝囊花

遊山歸錢越秀呂灌園出示見送詩戲荅二首

一卷新詩吟不盡歸來只與未遊同野人胸次無宿物好景仍在廬山中
千古才難洵不疑敢將輕薄入文辭眼空除是東坡老咲得徐凝瀑布詩

自題廬山紀遊集後

半生讀書不得力浪走風塵嗟暮色名山五岳杳無期此日匡廬面初識千秋

物象遞顯晦幾輩閒人肯登陟謫仙頭白倘歸來白石清泉聞太息獨移瘦杖
扣石鏡雙眼快對晴空拭已知絕境少豺狼那怕荒蹊犯荆棘鴉飛不到力有
限龍起無時神莫測橋邊聽瀑雨淙淙峯頂看雲松晏晏三秋忽變候寒暑半
月略盡山南北偶然興至或留題聊藉微吟豁胸臆詩成直述目所覩老矣焉
能事文飾仙靈幽祕苦雕剗雲霧蒼茫每深匿忽逢生客一呈露可惜無才收
不得歸途鹵莽方自嗤遊況匆忙誰見逼人間涉歷多梗滯祇此一途猶未塞
皇天亦似憫汝窮恣爾窮探無吝嗇如何汲汲向城市若赴巖程拘漏刻他年
終伴采芝翁臨別有言吾敢食

敬業堂詩集卷十五